

河南洛陽縣志

清嘉慶十八年

陸繼輅魏襄同纂

洛陽縣志卷五十

洛陽縣知事曾炳章重印

清舉

人陸繼輅

同纂

洛陽縣知縣魏襄

良政傳

卜式

漢書本傳河南人也以田畜為事有少弟弟壯

式脫身獨取畜羊百餘田宅財物盡與弟式入山牧

十餘年羊致千餘頭買田宅而弟盡破其產式輒復

分與弟者數矣時漢方事匈奴式上書願輸家財半

助邊上使使問式欲為官乎式曰自少牧羊不習仕

宦不願也使使者曰家豈有寃欲言事乎式曰臣生與

人無所爭邑人貧者貸之不善者教之所居人皆從

式式何故見寃使者曰苟子何欲式曰天子誅匈奴
愚以為賢者宜死節有財者宜輸之如此而匈奴可
滅也使者以聞上以語丞相宏宏曰此非人情不軌
之臣不可以為化而亂法願陛下勿許上不報數歲
乃罷式式歸復田牧歲餘會渾邪等降縣官費眾倉
府空貧民大徙皆仰給縣官無以盡贍式復持錢二
十萬與河南太守以給徙民河南上富人助貧民者
上識式姓名曰是固前欲輸其家半財助邊乃賜式
外繇四百人式又盡復與官是時富豪皆爭匿財唯
式尤欲助費上於是式終長者乃召拜式為中郎
賜爵左庶長田十頃布告天下尊顯以風百姓初式

不願為郎上曰吾有羊在上林中欲令子牧之式既為郎布衣少躄而牧羊歲餘羊肥息上過其羊所善之式曰非獨羊也治民亦猶是矣以時起居惡者輒去毋令敗羣上奇其言欲試使治民拜式緱氏令緱氏便之遣成臯令將漕最上以式朴忠拜為齊王太傅轉為相會呂嘉反式上書曰臣聞主媿臣死羣臣宜盡死節其駕下者宜出財以佐軍如是則強國不犯之道也臣願與子男及臨菑習弩博昌習船者請行死之以盡臣節上賢之下詔褒美賜爵關內侯黃金四百斤田十頃布告天下使明知之以壽終賈捐之漢書本傳字君房諡曾孫元帝初上疏言事

召待詔金馬門時珠厓郡叛朝議擊之捐之建議以
為不可帝問于定國定國曰捐之議是於是下詔集
珠厓後以忤石顯被誅士論惜之

郭賀 後漢書本傳字喬卿洛陽人祖父堅伯父游君

並修清節不仕王莽賀能明法累官建武中為尚書
令在職六年曉習故事多所匡益拜荊州刺史引見
賞賜恩寵隆異及到官有殊政百姓便之歌曰厥德
仁明郭喬鄉忠正朝庭上下平顯宗巡狩到南陽特
見嗟嘆賜以三公之服黼黻冕旒勅行部去襜帷使
百姓見其容服以章有德每所經過吏人指以相示
莫不榮之永平四年徵拜河南尹以請靜稱在官三

年卒詔書憫惜賜車一乘錢四十萬

黃尚 後漢書周舉傳字河伯河南郡人少歷顯位以政事稱為司徒與尚書周舉太常桓焉議災青帝從之

慶鴻 後漢書廉范傳洛陽人慷慨有義節與杜陵廉范為刎頸交時人稱曰前有管鮑後有慶廉位至琅邪會稽兩郡太守所在有異政

尹存 後漢書李固傳河南人漢順帝時李固疏薦杜喬復薦存等詔竝徵用

呂亮 隸釋孟郁修堯廟碑字元山河南人仕為成陽令宰政宣化慈惠博覆為蔡元來福奉事大聖司司

不解

趙整 十六國春秋本傳字文業苻秦時為散騎常侍

常盡忠匡諫時秦主堅頗好酒色整嘗為詩上之曰

昔聞孟津河千里有一曲此水本自清是誰使令濁

堅正色曰朕之過也案本傳作略陽人而通志載

入洛陽當必有據今仍之

孟威 魏書本傳字能重洛陽人歷東宮齊帥羽林監

時四鎮高車叛投蠕蠕高祖詔威曉喻禍福追還逃

散分配為民後以明解北人語勅在著作備推訪永

平中加龍驤將軍出使高昌正光初蠕蠕王阿那瓌

歸國詔遣威副陸希道遠畿迎接及其還國復以威

為使主送之前後頻使邊蕃皆稱旨復加撫軍將軍
普泰中除大鴻臚卿尋加驃騎大將軍左光祿大夫
卒贈冀州刺史子恂嗣

孟季 魏書孟威傳威弟稍遷鎮遠將軍左中郎將廷
尉監以本將軍除廣州刺史預介朱榮義舉封鉅鹿
縣開國公食邑一千戶除撫軍將軍廷尉卿轉司農
卿出為平西將軍華州刺史卒贈車騎大將軍雍州
刺史

楊機 魏書本傳字顯略洛陽人少有志節為士流所
稱河南尹季平元暉並召署功曹暉尤任以郡事自
以為委得其才時詔選清直之士為皇子國官機見

舉為京兆王愉國中尉愉敬憚之遷給事中延昌中
行河陰縣事機明達政事斷獄以情荊州刺史楊大
眼啟為其府長史累遷鎮軍將軍司州治中轉別駕
荊州蠻叛兼尚書左丞南道行臺討之還除中散大
夫建義初拜平南將軍光祿大夫歷度支尚書機方
直之心久而彌厲奉公正已為時所稱家貧無馬多
乘小犢車時論許其清白與辛雄等並誅于毗羅解
褐開府參軍事卒於鎮遠將軍兄順字元信仕至梁
郡太守順子僧靜武定中大中大夫機兄子虬少有
幹頗為司州記室戶曹從事

房謨 北齊書本傳字敬放洛陽人仕西魏歷昌平代

郡太守所在廉惠神武入洛拜潁川太守徵為丞相
右長史以清直被賞遇累遷驃騎大將軍攝南汾州
事卒諡文惠

高隆之 北齊書本傳字延興洛陽人深沉有志氣行
臺于暉引為郎中與西魏神武深相結託從起兵於
山東累遷并州刺史入為尚書右僕射時初給人田
權貴皆占良美貧弱咸受瘠薄隆之啟神武均平之
武定中除尚書令遷太保卒贈太尉隆之欽尚文雅
寡姊為尼事之如母訓督諸子必先文義世以此重
之

薛琰 北齊書本傳字曇珍河南人為典客令每引客

見儀望甚美魏帝謂之曰卿風度峻整姿貌秀異後
當升進何以處官琬曰宗廟之禮不敢不敬朝廷之
事不敢不忠正元中行洛陽部內肅然有犯法者未
如拷掠直以辭理罪數多得其情於是豪猾畏威事
務簡靜時以久旱京師見囚悉名集華林理問冤滯
洛陽繫獄唯有三人魏孝明嘉之遷吏部尚書天平
初高祖引為丞相長史琬宿有能名深被禮遇軍國
之事多所聞知累遷尚書僕射卒
元孝友北齊書本傳洛陽人滄州刺史為政溫和明
於政理嘗陳黨族間鄰徵發之弊定妻妾之制婚葬
之禮在官積年以法自守甚著聲稱齊天保初與元

暉業同為文宣所害

元文遙北齊書本傳字德遠洛陽人任北齊累遷尚書左僕射歷事三主諳習世務時因魏宰縣多用廝濫文遙搜揚貴遊子弟用之士人為縣自此始文遙初有田十餘頃為人侵奪及貴其人尚在乃將家逃竄文遙大驚追加慰撫還以與之彼人愧而不受彼此相讓遂為闕田其和厚與物無競若此

元景皓北齊書本傳洛陽人魏昭成皇帝五世孫高祖虔封陳留王父祚襲爵祚卒景皓嗣性剛毅天保時誅諸元親近其疏宗議請姓高氏皓云豈得棄本宗隨他姓大丈夫寧可玉碎不能瓦全文宣乃收皓

誅之家屬徒彭城

元行恭 北齊書元文遙傳文遙子有父風兼俊才位

中書舍人待詔文林館齊亡陽休之等十八人同入

開府稍遷司勳下大夫隋開皇中位尚書郎

元行如 北齊書元文遙傳行恭弟亦聰慧早成武平

末任著作佐郎

元豫 北齊書本傳字景豫洛陽人與景皓同祖美容

儀有器幹位終東徐州刺史

元偉 周書本傳洛陽人少好學能文仕周累遷小司

寇嘗報聘於齊遂為齊人所執後三年齊平偉方見

釋高祖以其久被幽繫加授上開府庾信贈詩曰貌

亡垂赫反齊平寶鼎歸其為當時所重如此
長孫儉周書本傳洛陽人其先魏之枝族姓托拔氏
孝文遷洛改為長孫少方正有操行性不妄交起家
員外散騎侍郎歷荊州刺史所部鄭縣令泉琛為民
所訟推治獲實儉集僚屬謂之曰此由刺史教誨不
明信不被物非全之罪遂肉袒自罰於是屬城肅勵
莫敢犯法魏文帝璽書勞之荆蠻舊俗大革務廣耕
桑兼習武事故邊境無虞民安其業吏民表請為儉
構清德樓樹碑刻頌朝議許焉歷二載徵授大行臺
尚書兼相府司馬嘗與羣公侍坐及退太祖謂左右
曰此公開雅孤每與語嘗肅然畏敬恐有所失進爵

昌寧公遷大將軍移鎮荊州總管五十二州及薨荆
民感儉遺愛詣闕請立廟樹碑詔許之子隆

長孫紹遠周書本傳字師洛陽人父稚魏太史錄尚

書上黨王紹遠性寬容有大度望之儼然朋儕莫敢

褻狎好墳籍聰慧過人時稚作牧壽春紹遠年十三

稚管記王頌聞紹遠疆記心以為不然遂白稚願驗

之於是命紹遠讀月令數紙繞一編誦之若流頌乃

服魏孝武初累遷司徒右長史及齊神武稱兵而帝

遷紹遠隨稚奔赴又累遷殿中尚書太祖謂羣公曰

長孫公任使之處令人無反顧憂漢之蕭寇何足多

也拜大司樂孝閔踐阼封上黨公

趙肅 周書本傳字慶雍洛陽人世仕河西及沮渠氏
滅曾祖武始歸於魏祖興父申侯肅早有操行知名
於時孝昌中起家殿中侍御史大統三年獨孤信東
討肅率宗人為鄉導授司州別駕監督糧儲軍用不
匱周文帝聞之謂人曰趙肅可謂洛陽主人也十三
年封清河縣子十六年除廷尉卿肅久在理官執心
平允凡所處斷咸得其情廉慎自居不營產業時人
以此稱之十七年進位車騎大將軍儀同三司散騎
常侍賜姓乙弗氏以心疾去職卒於家子軌
于翼 周書本傳字文若太師燕公謹之子美風儀有
識度年十一尚太祖女平原公主拜員外散騎常侍

封安平縣公大統十六年進爵郡公遷武衛將軍謹
平江陵所賜得軍實分給諸子翼一無所取唯簡賞
口內名墜子弟有士風者別待遇之孝閔帝踐阼出
為渭州刺史翼兄實先莅此州頗有惠政翼又推誠
布信事存寬簡夷夏感悅比之大小馮君焉以功贈
邑一千二百戶尋徵拜右宮伯世宗崩翼與晉公護
同受遺詔立高祖保定元年徙軍司馬三年改封常
山縣公遭父憂去職居喪過禮為時輩所稱尋有詔
起令視事高祖又以翼有人倫之鑒皇太子及諸王
等相傳以下並委翼選置其所擢用皆民譽也時論
僉謂得人遷大將軍總中外宿衛兵事建德二年出

為安州總管四年高祖將東伐朝臣未有知者遣納
言盧韞等前後乘驛三詣翼問策翼贊成之及軍出
詔翼率荆楚兵二萬自宛葉趣襄城大將軍張光洛
鄭恪等並隸焉旬日下齊一十九城所部都督輒入
民村即斬以徇由是百姓欣悅赴者如歸大象初詔
巡長城立亭鄣西自雁門東至碣石創新改舊咸得
其要害云仍除幽州總管先是突厥屢為寇抄居民
失業翼素有威武兼明斥候自是不敢犯塞百姓安
之開皇初拜太尉三年五月薨贈本官諡曰穆翼性
恭儉與物無競常以滿盈自戒故能以功名終子璽
黎陽郡公璽弟銓常山公銓弟讓儀同三司

于義 隋書本傳字慈恭洛陽人父謹從魏武帝入關
仕周官至太師義以父功賜爵平昌縣伯起家直閣
將軍後改封廣都縣公累遷安武太守郡民張善安
王叔兒爭財相訟義曰太守德薄不勝任之所致非
其罪也取家財倍與二人喻而遣去善安等各懷恥
愧移貫他州於是風教大治進封建平郡公歷西兗
瓜邵三州刺史數從征伐進位開府及高祖作相王
謙構逆以義為行軍總管義將左軍擊破之拜潼州
總管超拜上柱國時義兄翼為太尉弟智兄子仲文
並上柱國大將軍已上十餘人稱為貴戚卒諡剛子
宣道宣敏並知名

于宣道 隋書于義傳字元明性謹密不交非類以父
功賜爵成安縣男高祖為丞相引為外兵曹尋拜儀
同及踐阼遷內史舍人進爵為子丁父憂水漿不入
口者累日獻皇后命中使敦諭歲餘起令視事免喪
拜車騎將軍兼左衛長史舍人如故後遷太子左衛
副率進位上儀同子志寧蚤知名出繼叔父宣敏
于宣敏 隋書于義傳字仲達少沉密有才思年十一
詣周趙王招王命之賦詩詩甚有幽貞之志王大奇
之坐客莫不嗟賞起家右侍上士遷千牛備身高祖
踐阼拜奉車都尉奉使撫慰巴蜀及還上疏帝省表
嘉之謂高穎曰于氏世有人焉竟納其言宣敏常以

威滿之誠昔賢所重每懷靜退著述志賦以見志卒
年二十九

賀若誼 隋書本傳字道機洛陽人祖伏連魏雲州刺
史誼性剛果有幹畧在魏以功臣子賜爵容城縣男
累遷直閣將軍大都督同大祖據關中引之左右嘗
使詣杏城屬茹茹種落攜貳屯於河表誼因譬以禍
福降者萬餘太祖深奇之尋拜車騎大將軍儀同三
司閔帝受禪加開府歷靈邵二州刺史原信二州總
管俱有能名高祖為相拜亳州總管馳驛之部西邊
司馬消難東拒尉迥中州刺史李慧反誼討之進爵
范陽郡公授上大將軍開皇初入為右武侯將軍歷

華州敷州涇州刺史時突厥屢為邊患朝庭以誼素
有威名拜靈州刺史進位柱國數載乞歸詔許之卒
年七十七子舉襲爵庶長子協官至驃騎將軍協弟
祥奉車都尉祥弟與車騎將軍誼兄子弼別有傳
長孫平 隋書本傳字處均洛陽人父儉周柱國高祖
微時與平情好款洽及為丞相恩禮彌厚賀若弼鎮
壽陽高祖恐其懷二心遣平代之弼果不從平麾壯
士執弼送京師開皇三年徵拜度支尚書平見天下
州縣多罹水旱百姓不給奏令民間每秋家出粟一
石已下貧富差等儲之閭巷以備凶年名曰義倉上
深嘉納後轉工部尚書未幾遇譴以尚書檢校汴州

事歲餘除汴州刺史歷許貝二州俱有善政鄴都俗薄難治刺史多不稱職朝庾以平所在善稱轉相州刺史甚能名仁壽中卒諡康

元暉 隋書本傳字叔平洛陽人仕周補相府中兵參軍遷武伯下大夫時突厥入寇令暉賫錦綵出使暉說以利害可汗大悅遣其子名王獻以方物入隋累轉兵部尚書

元孝矩 隋書本傳洛陽人西魏同姓襲爵始平縣公拜南豐州刺史周太祖將危元氏孝矩慨然有興復社稷之志為兄所阻入拜壽州總管轉涇州刺史卒於官諡曰簡

長孫覽 隋書本傳字休因洛陽人父紹遠仕周為小
宗伯覽有器量涉書記尤曉鍾律明帝時拜車騎大
將軍每公卿上奏必令省讀及誅宇文護以功封薛
國公入隋仕終涇州刺史子洪北平太守有惠政
長孫熾 隋書長孫覽傳字仲光洛陽人覽從子性敏
慧頗涉羣書兼長武藝後周武帝尚道法置通道館
學士熾應其選入隋授內史舍人上儀同三司尋攝
判東宮右庶子出入兩宮甚被委遇加以處事周密
高祖每加稱美大業初歷官戶部尚書時吐谷渾寇
張掖命熾率精騎五百擊走之追至青海而還進銀
青光祿大夫率諡曰靜子安世通事謁者

元亨 隋書本傳字德良洛陽人父季海元魏司徒馮翊王周太祖以亨功臣子優禮之歷武衛將軍勳州刺史入隋拜太常卿出為衛州刺史在職八年風化大洽後以病免卒諡曰宣

于璽 隋書于仲文傳字伯符父翼仕周為上柱國幽州總管任國公高祖為丞相尉迥作亂遣人誘翼翼鎖其使送長安高祖悅及受禪翼入朝上為之降榻握手極歡數日拜太尉歲餘卒諡曰穆璽少有器幹周武帝時從齊王憲破齊師於洛陽賜爵豐寧縣子尋從帝平齊加開府改封黎陽縣公宣帝嗣位轉右勳曹中大夫尋領右忠義高祖為丞相加上開府及

受禪進位大將軍拜汴州刺史有能名尋進爵郡公
轉邵州刺史後檢校江陵總管州人張願等數十人
詣闕上表請留璽上嘉歎之令遷邵州父老相賀尋
遷洛州刺史後為熊州刺史並有惠政以疾還京師
卒諡曰靜子志本

元巖 隋書本傳字君山洛陽人父正魏敷州刺史巖
好讀書以名節自許仕周累遷內史中大夫昌樂縣
伯隋初拜兵部尚書進爵平昌郡公巖巖重明達世
務每有奏議侃然正色無所迴避諸公卿皆敬憚之
開皇間出為益州總管蜀中訟獄凡經裁斷莫不悅
服卒於官益州父老咸哀思之

元壽 隋書本傳字長壽洛陽人博涉經史仕周授儀
同三司開皇初以平陳功拜尚書左丞及奏劾韓徽
之等虧失憲體拜太常少卿後轉左翊衛將軍從征
遼東卒於軍贈尚書右僕射光祿大夫諡曰景

衛

元 隋書本傳字文昇洛陽人少有器識初仕周為

檢校熊州事開皇初遷淮州總管進封同軌郡公山
獠作亂出為資州刺史以鎮撫之元單騎造其營說
以利害渠帥感悅解兵而去前後歸者十餘萬口累
官刑部尚書

源

師 隋書本傳字踐言洛陽人父文宗有重名於齊

終莒州刺史師起家參軍選郎中攝祠部後屬孟夏

以龍見請雩時相為真龍出見問所在師曰此龍星
初見依禮當雩祭郊壇相作色曰何乃干知星宿祭
竟不行師出歎曰國家大事在祀與戎禮既廢也何
能久乎齊亡無日矣周武帝平齊授司賦上士高祖
受禪除魏長史入為尚書左右丞以明幹著稱時蜀
王秀頗違法度乃以師為益州總管司馬俄而秀被
徵秀恐京師有變將謝病師垂涕勸之乃從徵秀廢
後官屬多連坐師以此獲免仕至刑部侍郎
趙軌 隋書循吏傳洛陽人父肅元魏廷尉卿軌少好
學有行檢隋文帝時為齊州別駕有能名其東鄰有
桑椹落其家軌遣人拾還其主及徵入朝父老相送

揮涕曰公清若水請酌一杯水以餞執受而飲之既
至京師與牛宏等撰定律令格式累官壽州總管長
史

房恭懿 隋書本傳字慎賢洛陽人 深沉有局量開
皇初授澤州司馬有異績改歸州政復為天下最文
帝甚異之因謂諸州朝集使曰如恭懿志存體國愛
養然百姓此上天宗廟之所祿也即拜為刺史後坐
論配防嶺南及徵還道卒

吉頊 唐書本傳河南人舉進士遷龍馬監突厥陷趙
定授檢校相州刺史且募兵制虜南向頊至無應者
俄詔以皇太子為元帥應募日數千頊還言狀后曰

人心若是邪卿可為羣臣道之頊誦語於朝諸武惡
之聖歷二年進天官侍郎同鳳閣鸞臺平章事為刺
史張易之兄弟以寵盛思自全問頊計頊曰天下思
唐久矣武諸王非海內屬意公盍從容請相王廬陵
以副人望易之昌宗乘間如頊教后意乃定既而知
頊謀召見問狀頊對廬陵相王皆陛下子先帝顧託
於陛下當速有所付乃還中宗明年頊坐弟冒偽官
貶琰川尉尋徙始豐尉卒中宗之立頊竇倡之會得
罪無知者睿宗初有發明其忠乃下詔贈御史大夫
席豫唐書本傳字建侯河南人為襄邑尉奏事闕下
會安樂公主請為皇太女豫曰昔梅福上書譏后族

彼何人哉乃上疏請立皇太子語深切太平公主聞
其名將表為諫官豫恥之遁去俄舉賢良方正異等
為陽翟尉累遷考功員外郎進絀清明出鄭州刺史
韓休輔政舉代已拜吏部侍郎元宗曰卿前日考功
職詳事允故有今授豫典選六年拔寒遠士多至臺
閣當時推知人號席公云進禮部尚書累封襄陽縣
子卒贈江陵大都督諡曰文
陽嶠 唐書本傳洛陽人舉八科皆中調將陵尉累遷
詹事司直長安中左右御史中丞桓彥範袁恕已爭
取為御史久之選國子司業嶠資謹飭好學喜誘勸
後生修講舍人以為善職睿宗立進尚書右丞時議

建都督府擇最吏故嶠為涇州刺史都督議罷歷魏
州刺史荊州刺史本道按察使率以清白聞入為國
子祭酒封北平縣伯嶠撫孤姪與子均常語人曰吾
備位方伯而心亦昔時一尉耳以老致仕卒諡曰敬
房琯唐書本傳字次律河南人父融武后時以正諫
大夫同鳳閣鸞臺平章事神龍元年貶死高州琯少
好學風度沈整隱陸渾山開元中以薦為校書郎累
遷吏部尚書同平章事封清河郡公乾元初出為邠
州刺史時邠以武將領刺史故綱目廢弛即治府為
營吏攘民居相清謹琯至一切革之入以便安詔拜
太子賓客加禮部尚書卒贈太尉

房式 唐書房瑄傳瑄族孫擢進士累遷忠州刺史後
拜給事中使河北還奏如旨遷陝虢觀察使改河南
尹會討王承宗鎮州索餉車四千乘民不能具式建
言歲凶人勞不任調發又御史元稹亦言賊未禽而
河南民先困詔可都鄙安之改宣歙觀察使卒贈左
散騎常侍

于教 舊唐書于休烈傳字蹈中河南人休烈孫以家
世文史盛名少為特彥所稱志行修謹登進士第釋
褐祕書省校書郎試監察御史元和六年真拜監察
御史轉殿中歷倉部司勳二員外萬年令拜右司郎
中出為商州刺史長慶四年入為吏部郎中其年遷

給事中尋轉工部侍郎遷刑部出為宣歙觀察使兼御史中丞教溫裕長者與物無忤居官亦未嘗有立周踐臺閣三為列曹侍郎謹順自容而已大和四年八月卒年六十六贈禮部尚書四子球珪瓌琮皆登進士第

于琮 舊唐書于休烈傳教子尚廣德公主拜駙馬都尉累踐臺閣揚歷藩府乾符中同平章事黃寇犯京師僖宗出幸琮病不能從既僭號起琮為相琮以疾辭迫脅不已琮曰吾病亟矣死在旦夕加以唐室親姻義不受命死即甘心竟為賊所害而赦公主主視琮受禍謂賊曰妾李氏女也義不獨存願與于公并

命賊不許公主入室自縊而卒廣德閨門有禮咸通
乾符中譽在人口于族內外冠婚喪祭主必自預行
禮諸婦班而見之尊卑荅勞咸有儀法為時所稱珪
球皆至清顯

盧邁 唐書本傳字子元河南人性孝友舉明經補太
子正字累遷吏部員外郎出為滁州刺史召還遷諫
議大夫數條當世利病轉同中書門下平章事進中
書侍郎時陸贄趙璟專大政邁居中治身循法無它
過後以病歸卒贈太子太傅

張鎰 唐書本傳字季權河南人為殿中侍御史華原
令盧樅為邑人所構有司以死論鎰不直之理從遂

免死坐貶撫州司戶參軍大歷初為濠州刺史後拜相罷為鳳翔隴右節度使朱泚之亂為其黨李楚琳殺之詔贈太子太傅

蕭昕 唐書本傳字中明河南人中博學宏詞科調壽安尉累遷禮部侍郎大歷中持節使回紇責其失禮回紇厚禮之德宗幸奉天昕年八十餘步至奉天遷太子少傅兼禮部尚書卒年九十三贈大都督諡曰懿

盧坦 唐書本傳字保衡洛陽人為河南尉時杜黃裳為尹遇之甚厚累遷刑部郎中御史中丞再遷戶部侍郎與宰相李吉甫議不合出為東川節度使卒贈

禮部尚書

劉伯芻 唐書劉廼傳字素芝伊闕人兵部侍郎廼之
子行修謹淮南杜佑奏署節度府判官府罷詔拜右
補闕遷主客員外郎為韋執誼陰劾貶虔州參軍久
乃除考功員外郎歷刑部侍郎左散騎常侍卒贈工
部尚書伯芻風度高嚴善談詭而動與時適論者少
之

劉寬夫 唐書劉廼傳伯芻子寶歷中為監察御史奏
言以王府官攝祠位輕非嚴恭意請以尚書省東宮
三品若左右丞侍郎通攝俄轉左補闕陳岵注浮屠
書因供奉僧以聞除濠州刺史寬夫劾狀敬宗怒謂

宰相曰岵不繇僧得州諫臣安受此言寬夫曰衆劾
岵獨臣草狀應伏誅推言所從恐累國體帝謹其言
釋之子允章咸通中為侍郎

獨孤及 唐書本傳字至之洛陽人兒時讀孝經父試
之曰兒志何語對曰立身行道揚名於後世天寶末
以道舉高第補華陰尉代宗召為左拾遺上疏陳政
事得失言甚切直遷禮部員外郎歷濠舒二州刺史
歲饑旱鄰郡民皆流離舒人獨安徙常州甘露降其
廷卒諡曰憲及喜鑒拔後進性孝友其為文彰明善
惡長於議論得褒貶之正

獨孤朗 唐書獨孤及傳字用晦及子由處士辟署府

元和中擢右拾遺因請罷伐蔡貶興元戶曹參軍久之召還拜殿中侍御史復以事出為韶州刺史召還遷諫議大夫宦官毆鄆令崔發雞千下朗請誅首惡以正常法王播賂權近還判鹽鐵朗連疏論執遷御史中丞工部侍郎出為福州觀察使卒贈右散騎常侍

獨孤郁 唐書獨孤及傳朗母弟元和初舉制科高第拜右拾遺吐突承瓘討王承宗郁執不可提議鯁固號稱職擢翰林學士權德輿輔政郁以德輿壻引嫌去內職拜考功員外郎德輿去位還為學士以疾辭徙祕書少監卒贈絳州刺史子庠仕至尚書丞

孫平子

綱目伊闕人博學能文舉制科為右正言性

簡直敢言開元五年以七廟已滿遷中宗於別廟而祀睿宗平子上言春秋譏魯躋僖公兄臣其弟猶不可況弟臣其兄乎若以兄弟同昭則不應置兄於別廟願下羣臣博議博士蘇獻等以平子誣罔蘇頲之主獻議平子論之不已遂謫都城尉然時論多是平子焉

于頔 全唐書詩傳字允元河南人以蔭補千牛擢累駕部郎中湖蘇二州刺史襄州節度觀察使元和初拜司空尋貶恩王傅終太子賓客
賈餗 舊唐書本傳字子美河南人祖渭父寧餗進士

擢第又登制策甲科文史兼美四遷至考功員外郎
長慶初策召賢良選當時名士考策餼與白居易俱
為考策官選文人以為公尋以本官知制誥遷庫部
郎中充職四年為張又新所構出為常州刺史太和
初入為太常少卿二年以本官知制誥三年七月拜
中書舍人四年九月權知禮部貢舉五年屬出後正
拜禮部侍郎凡典禮闈三歲所選士七十五人得其
名人多至公卿者七年五月轉兵部侍郎八年十一
月遷京兆尹兼御史大夫九年四月檢校禮部尚書
潤州刺史浙西觀察使制出來行拜中書侍郎同平
章事進金紫階封姑臧男食邑三百戶加集賢殿學

士監修國史其年十一月李訓事發被誅死非其罪
世多寃之

曹確 唐書本傳字剛中河南人擢進士累拜兵部侍郎懿宗時同平章事確儒術深邃器識方重居位六年出為節度使徙河中卒始畢誠與確同相俱有雅望世為曹畢云

石洪 唐書烏重循傳字濬川洛陽人舉明經為黃川錄事參軍謝病還歸東都十餘年不出公卿數薦皆不答烏重循鎮河陽求賢者以自重或薦洪重循曰彼無求於人肯為我來耶乃具書幣邀辟洪亦謂重循知己乃欣然戒行重循喜其至禮之後召為昭應

殿集賢校理大歷三年卒諡曰忠

劉宗望 舊唐書本傳河南人八代祖隋大理卿坦生
政會輔太宗起義晉陽官至戶部尚書封渝國公圖
形凌煙閣政會生元意尚太宗女南平公主歷洪饒
八州採訪使元意生奇位至吏部侍郎奇生慎知仕
至獲嘉令慎知生聚仕至東阿令聚生藻位終祕書
郎藻生符進士登第咸通中位終蔡州刺史生八子
宗龜宗望宗魯宗暮最知名宗龜咸通六年進士擢
第累遷尚書出為廣州刺史清海軍節度使嶺南東
道觀察處置等使卒宗望咸通十五年登進士科累
遷監察御史右補闕起居郎宏文館學士轉司勳吏

部二員外郎崔安潛為吏部尚書崇望判南曹滌除宿弊復清選部昭宗即位拜中書侍郎同平章事累兼兵部吏部尚書大順初同列張濬畫策討太原崇望以為不可濬果敗濬黜崇望代為門下侍郎監修國史判度支明年玉山都頭楊守信協楊復恭稱兵闕下陣於通化門上陳兵於延嘉門是夜命崇望守度支庫明日曉入含光門未開門內禁軍列於左右俟門開即劫掠兩市及聞傳呼宰相來門方啟崇望駐馬慰諭之曰聖上在街東親總戎事公等禁軍何不樓前殺賊立取功名切不可剽掠街市圖小利以成惡名也將士唯唯從崇望至長樂門守信見兵來

即遁去軍士呼萬歲是日庫市獲全軍人不亂緊崇
望之方累也尋加左僕射光化二年卒時年六十二
冊贈司空崇魯廣明元年登進士第鄭從謹奏充太
原推官時兄崇龜為節度判官昆仲同居幕府尋轉
掌書記中和三年入朝拜右拾遺左補闕景福初以
水部員外郎知制誥崇謨中和三年進士及第乾寧
末為太常少卿宏文館直學士

司馬希象 唐書司馬鏗傳河南人仕殿中侍御史剛
正不諂終主爵員外郎

李觀 唐書本傳洛陽人少沉厚寡言以策干節度使
郭子儀遣佐坊州刺史吳休為防遏使以親喪解職

吐蕃內寇觀率鄉里子弟數千人守黑水虜不敢侵
楊慎微奏為偏將累遷四鎮北廷行軍涇原節度使
在屯四年調部伍儲藏饒行平涼之盟吐蕃不得志
以少府監檢校工部尚書卒贈太子少傅
房武韓愈所撰墓誌銘河南人曾祖元靜尚書膳部
郎中歷資管涇隰泗州刺史祖某虢州司馬父密都
水使者武以明經歷官興元少尹謹飭畏法常以殿
中侍御史副丹陽軍使其後為蓋屋令施州刺史吏
民思之卒葬河南緱氏之高龍原
元盛穆員所撰墓誌銘洛陽人曾祖善應金紫光祿
大夫司膳卿汝陽公祖崇敏集州司馬父履清處士

盛官歷憲府法寺宰邑椽京者十其蒞官也剛決堅
利致用如金易人之所難敢人之所畏累佐戎府獨
步神州卒葬首陽山

嚴郢 柳宗元先友記河南人號忠能為京兆河南尹
御史大夫善舉職為邪險搆扇以貶死

元全柔 先友記河南人氣象甚偉好以德報怨恢然
者也為大官有士地入為太子賓客

宇文邈 先友記河南人有文謹慤人也為御史中丞
齷齪自守然以直免官復為刺史卒

皇甫政 先友記河南人有威儀由浙東廉使為太子
賓客

袁高 先友記河南人以給事中敢諫爭貞直忠謇舉
無與比能使所居官大再贈至禮部尚書

路泌 先友記河南人以尚書郎使西戎留戎中度今

已年八十餘既和戎十五年不得歸無為言者

房啟善 先友記字清言由萬年令為容州經畧于申

至尚書郎常仲孺今為諫議大夫俱河南人

李鄴 五代史本傳洛陽人曾祖垣馮翔令祖仲芳大

理司直父元福建觀察推官鄴仕梁歷滑魏宋三鎮

留後遷禮部尚書至唐以太子少傅致仕卒贈太保

子延昭殿中丞

桑維翰 五代史本傳河南人為人醜恢身短面長初

舉進士主司惡其姓不取或勸其他仕乃著日出扶
桑賦以見志鑄鐵硯示人曰硯敝則改業卒進士晉
高祖特辟為河陽掌書記嘗使契丹以功累遷至樞
密使後景延廣用事與契丹絕盟契丹犯京師使張
彥澤問太后維翰在否可使先來帝不欲維翰見契
丹因使彥澤圖之彥澤亦利維翰貲產傳帝命下獄
縊殺之

張策 五代史本傳字少逸父同燉煌人徙居洛陽敦
化里浚井得古鼎銘曰魏黃初元年春二月匠吉千
同以為奇時策年十三在側啟曰漢建安二十五年
曹公薨改元建康是歲十月文帝受禪又改黃初是

年無二月銘何謬耶同大驚異梁太祖兼四鎮辟為
鄭滑度支使及即位累遷工部侍郎開平初以刑部
尚書致仕卒於洛

盧質 五代史本傳字子微河南人父望唐司勳郎中
質為祕書郎丁母憂去職晉王以為河東節度掌書
記質與張承業等定議立莊宗為嗣莊宗將即位以
質為大禮使拜行臺禮部尚書及即位欲用為相質
性疎逸不欲任責固辭拜太原尹北京留守累遷兵
部尚書天成初拜匡國軍節度使尋復拜兵部尚書
判太常卿事歷鎮河陽橫海晉高祖入立質以疾分
司西京拜太子太保卒年七十六贈太子太師諡文

忠

劉岳 五代史本傳字昭輔洛陽人唐民部尚書政會
之八代孫崇龜崇望其諸父也岳名家子好學敏於
文辭舉進士事梁為左拾遺侍御史末帝時累官兵
部侍郎梁亡貶均州司馬復用為太子詹事唐明宗
時為吏部侍郎故事吏部文武官告身皆輪朱膠紙
軸錢然後給其品高者則賜之貧者不能輪錢往往
但得勅牒而無告身岳請一切賜之由是百官皆賜
告身自岳始也初鄭餘慶嘗採唐士庶吉凶書疏之
式雜以常時家人之禮為書儀兩卷明宗詔岳選文
學通知古今之士共刪定之卒於官年五十六贈吏

部尚書子溫叟

趙孚 宋史本傳字大信洛陽人仕周為開封縣尉八
宋授永寧令會帝親征太原孚部送本邑糧饋民懷
其惠擢宗正丞太宗即位知開封府司祿參軍事命
行視黃河建議立分水之制鞠開封獄宥其非辜者
即日授推官累遷殿中侍御史雍熙中詔詢文武禦
戎之策孚上和戎議上嘉之後知其年老上曰孚名
士也賜以金紫

孔承恭 宋史本傳字光祖河南人父莊晉諫議大夫
承恭以廕入授秘書省正字藝祖時王審琦鎮壽春
薦為鄭州參軍太宗即位命監西京酒麴歷遷太常

寺少卿俄以疾求解官且言早游嵩少樂其風土願
卜居後將作監致仕以子玠為登封縣尉以便祿養
安忠 宋史本傳洛陽人祖叔于任右晉累任方鎮以
太子太師致仕忠形質魁岸久事太宗於藩邸及即
位授供奉官端拱初嘗護高陽關契丹入寇忠與崔
翰率兵屢卻之歷遷東上閣門使充淮南諸州兵鈐
轄以病免

溫仲舒 宋史本傳字乘陽河南人舉進士通判吉州
直史館拜樞密直學士咸平初以禮部尚書罷政出
知河陽踰年知開封府累遷至同知樞密院事仲舒
才堪應務與寇準同進人稱溫寇云

王承衍 宋史王審琦傳字希甫洛陽人父審琦鎮兗
海壽春皆署以牙職補內殿供奉官都知尚太祖女
昭慶公主授右衛將軍駙馬都尉仍充都知尋領恩
州刺史授彰國軍節度雍熙中出知天雄軍時契丹
內擾鄰境戒嚴城中大恐屬上元節承衍下令市中
及佛寺然燈設樂與賓佐宴遊達旦人賴以安召還
復為貝冀都部署端拱初換永清軍節度再知天雄
軍吏民千餘詣監軍請為本道節帥詔褒之真宗即
位改河中尹護國軍節度加檢校太尉以疾求罷節
鉞三抗表不許帝自臨問至卧內慰勉久之卒諡恭
肅子世安世隆世雄世融弟承衍

王承衍 宋史王審琦傳字希悅授閑廐使出監徐州
軍又為西京水南巡檢使改如京使表求治郡自效
命知潭州遷六宅使領昭州刺史俄知澶州加莊宅
使咸平中兩賜川陝傳詔慰撫官吏經畧蠻洞連知
延代并三州皆兼兵馬鈐轄改尚食使徙涇州授西
上閣門使改領永州刺史真宗以天水近邊番漢雜
處擇守臣撫治擢承衍知秦州徙知天雄軍進秩東
上閣門使改左武衛大將軍知壽州卒子世京世文
王克臣 宋史王審琦傳字子難祖承衍尚秦國賢穆
公主克臣第進士仁宗閱其文顧侍臣曰賢穆有孫
登科可喜也仕累通判壽州鼓角卒夜入州廨擊郡

將既就擒而監兵使所部被甲操刃立庭中官吏駭
觀克臣曰此不過為盜耳遣甲者去戒克卒勿妄引
他人衆謹服猶坐貶監潭州稅熙寧中為開封度支
二判官遷鹽鐵副使時鄭俠以上書竄嶺表克臣嘗
薦俠且餽之白金又坐奪官復為戶部副使以集賢
殿修撰知鄆州京東多盜克臣請以便宜處決械送
尤桀者斬以狗河決曹村克臣亟築隄城下人得趨
以避水事寧繪像祀之進天章閣待制徙知瀛州終
龍圖閣直學士大中大夫卒年七十六子師約
王師約 宋史王審琦傳字君授少習進士業英宗欲
求儒生為主壻命宰相召克臣諭旨令師約持所為

文至第明日獻賦一編即坐中賦大人繼明詩遂賜
對選為駙馬都尉尚徐國公主授左衛將軍神宗即位
拜嘉州刺史歷晉州觀察使哲宗立遷鎮安軍節度
觀察留後宣仁后臨朝師約屢上書言事議者以為
職不當上言褫其秩徽宗即位乃復保平軍留後又
為樞密都承旨未幾復罷卒子殊主所生至閬州觀
察使

康德輿 宋史本傳字世基洛陽人父贊元嘗從曹光
實龔李繼遷獲其母妻擢武州刺史贊元死真宗錄
德輿累官西上閤門使至和中河決頓邱德輿以巨
艘濟居民遂免墊溺復領果州團練使知冀州徙知

趙州有告雲冀卒謀為亂德興陰遣人捕首謀誅之
轉陳州鈐轄卒

王隨 宋史本傳字子正河南人登進士甲科以諫議
大夫權知開封府歷轉京西轉運副使陞辭且曰臣
父母家洛中乃在所部得奉湯藥聖王之澤也真宗
因賜詩寵行以羊酒束帛令過家為壽仁宗立累遷
門下侍郎同中書平章事昭文館大學士卒贈中書
令諡文惠

趙良規 宋史趙安仁傳字元甫洛陽人父安仁奏為
秘書省正字同判太常寺張知白薦之召試賜進士
及第擢集賢校理兼宗正丞預修會要出知秦滁二

州歷京西陝西路提點刑獄荆湖南路轉運使積官
至光祿卿改直祕書監知同陝相三州陝歲饑百姓
請闕殘稅二分為官伐芟以給河埽或以為須報乃
可行良規曰若爾無及矣檄縣遂行而以擅命自劾
進太子賓客遷尚書工部侍郎判本部知濠州卒良
規所至州郡為政不甚力然善委任佐屬祿賜多分
贍族人餘皆輸之酒家子君錫

趙尚寬宋史本傳字濟之河南人參知政事安仁子
知平陽縣鄰邑大囚十數夜逸殺居民將犯境尚寬
悉獲之知忠州俗畜蠱殺人乃揭方書市中教人服
藥索為蠱者寘於法嘉祐中以考課第一知唐州唐

素沃壤經五代亂士曠民稀尚寬按視圖記得召信
臣陂渠故迹復疏三陂一渠溉田萬餘頃又教民支
渠浸灌四方之民來者雲布復以荒田計口授之及
貸民官錢買耕牛三年榛莽為膏腴增戶萬餘三司
使包拯上其事詔嘉之仍進秩賜金留於唐民像以
祠王安石蘇軾作新田新渠詩以美之積官至司農
卿卒

張景憲 宋史本傳字正國河南人以父師德任淮南
轉運副使屬吏不法者多被案治累遷集賢殿修撰
河東都轉運使終知同州居官不累強禦自負所守
非公事不及執政之門母卒一夕髮鬚盡白世以此

稱之

楊日嚴 宋史本傳字垂訓河南人兄日華官至太常少卿日嚴進士及第試校書郎歷知襄廬鄆三州累遷東京轉運使會青徐饑日嚴乃請江淮陝西轉粟五十萬以賑貧民又開清河八十里抵暖水河以便漕運入拜太常少卿知益州為蜀人所信愛官終龍圖閣學士

尹仲宣 宋儒言行錄河南人咸平三年及第仕虞部員外郎廉幹有稱舉七子其著者源與洙

程琬 程頤叔父朝奉誌字季聰洛陽人贈太子少師羽曾孫虞部員外郎希振孫贈開府儀同三司適榮

子天性孝友淳質不事文飾事兄嫂如父母與人接
傾心腑年四十五以伯兄大中恩補郊社齋郎調修
武主簿秩滿授端氏令四遷至朝奉郎公當官竭力
不擇難易盡心於愛人故所至民愛之嘗捕蝗徒步
執箕為衆人先其不愛力皆此類喜救民利病力可
行者行之不能者言之上官雖沮卻不恨年七十五
卒葬於伊川祔先塋

張渭 黃庭堅張君墓誌字象之洛陽人曾祖去華仕
至工部侍郎贈司徒祖師錫光祿少卿父景伯職方
員外郎渭初仕主簿遷推官改知飛烏縣值元祐初
改復差役君悉取故役書治其凡而委其僚陰察其

財力戒吏具戶版等色而虛其名姓期日會民於廷
曰某服某役某服某役一邑吏皆驚民聘相視而定
飛鳥為山邑而公幣市絹居一州之半君請均歲市
之籍力爭之乃免民蒸嘗之以疾致仕

鄭驥 宋史本傳河南人舉進士歷慶汝鄭秦四州推
官慶歷中為河北轉運使會貝州王則反驥討平之
除天章閣待制知鳳翔府久之又以工部郎中知華
州為政愛民謙已利物推功與人有古道焉
王曙 宋史本傳字晦叔績之後移家河南登進士咸
平中舉賢良方正科知定海縣累遷河北轉運使坐
部吏受賂降知壽州旋以樞密直學士知益州繩盜

以峻法蜀人比之張詠為之謠曰誰人最良先張後
王惠我赤子俾無流亡何以報之俾壽而康入除給
事中後除御史中丞王清昭應吉災曙言先帝建此
非應經義特信方士邪說蠹耗財用災變之來若有
警者願除其地以應天變乃詔不復修繕俄以工部
侍郎參知政事景祐元年同中書門下平章事逾月
卒諡文康子蓋恭蓋柔蓋恭字達夫以廕補衛尉丞
性恬淡數解官就養父喪終以司門員外郎致仕間
與浮圖隱者遊洛陽名園山水無不至子復登朝累
遷司農少卿卒

王益柔 宋史王曙傳字勝之曙之子性伉直喜論天

下事用蔭至殿中丞慶歷中執政者以異已目為朋
黨欲傾之賴韓琦力救乃免黜監復州酒務久之為
開封府推官多所論列神宗朝累遷龍圖閣直學士
知蔡揚亳州江寧應天府司馬光為資治通鑑獨能
閱之終篇其好學類此

郭逵 李通志字仲通洛陽人宋史郭遵傳康定中兄
遵死於敵錄逵為三班奉職遷至泊將嘗與陳執中
論葛懷敏它日必僨事已而懷敏覆師人服其明保
州卒叛田況遣逵往招之逵至城下賊黨邀逵登城
既見申論禍福眾遂降累遷左武衛上將軍致仕
滕宗諒 宋史本傳字子京河南人舉進士累官刑部

員外郎知涇州范仲淹薦以自代擢天章閣待制從
慶州終知蘇州宗諒尚氣倜儻自任好施與及卒家
無餘財所泣州喜建學而湖州最盛所著有諫疏二
十餘篇

任布 宋史本傳字應之河南人力學家貧嘗從人借
書以讀舉進士累官樞密副使以太子少保致仕始
布歸洛中作五知堂謂知恩知命知道知足知幸也
卒諡恭惠子達歷官司封郎中
楚建中 宋史本傳字正叔洛陽人舉進士知滎河縣
民苦鹽稅不平建中約田多寡以為重輕時元昊歸
款建中疑之白府請築安定黑水八堡以控東南夏

人果來侵聞有備不敢入累遷陝西都轉運使知慶州江寧成德軍以正議大夫致仕元祐初文彥博薦除戶部侍郎不拜

范子奇 宋史范雍傳字仲濟雍之孫以蔭簽事并州判官累遷集賢殿修撰召權戶部侍郎刪酒戶苛禁人咸便之後知慶州廣儲蓄繕城柵嚴守備羈黠羌推誠待下人樂為用仕至吏部侍郎致仕

范坦 宋史范雍傳字伯履子奇之子以父任為開封府推官權起居舍人使於遠復命具語錄以獻徽宗覽而善之付鴻臚今後奉使者視為式累遷戶部侍郎論當卜及夾錫錢之弊坐論貶黃州團練使以教

復徽猷閣待制

富紹庭 宋史富弼傳字德先弼之子性靖重能守家
法弼薨兩女與壻及甥皆同居紹庭待之與父時不
殊族里稱焉建中靖國初除提舉河北西路常平辭
曰熙寧變法之初先臣不行青苗被罪臣不敢為此
官徽宗嘉之擢祠部員外郎未幾出知宿州卒於官
富直柔 宋史富弼傳字季弼之孫少敏悟有才名
靖康初名賜同進士除祕書正字建炎中遷御史中
丞多所建明仕至端明殿學士同知樞密院事
呂好問 宋史本傳字舜徒希哲子以父廢補官靖康
中為御史中丞數建大議彈劾無所畏避尋遷吏部

侍郎及金人入寇委曲以成中興之業建炎初為尚書右丞後以資政殿學士知宣州封東萊郡侯

趙思 宋史本傳洛陽人明春秋舉進士乾道七年宰相虞雍公薦之孝宗賜見便殿除太府寺簿擢太常丞俄兼度支郎選台州徙淮南運判淳熙初加知祕閣四年以戶部總領兩淮財賦入奏事擢起居舍人仕至禮部尚書

宋道 范忠宣公集字叔達河南人登進士為益州節度推官攝犀浦令民有訴其子之不逞者使其父先答之苦楚已至然後懲以輕法子遂改過盡孝其父語人曰吾有此子者宋君之賜也監鹽城縣都鹽倉

詳究鹽法利病為鹽政要錄一篇上之三司多行其說累遷司封郎中提點福建路刑獄歷知晉邠二州坐事免官復起知同州會改官制為朝請大夫道居官簡嚴職務皆有條理恕於用刑故所至人樂其政去而思之

王尚恭 范忠宣公集字安之河南人景祐元年登進士調慶成軍判官遷袁州判官時西郵用兵使領皆一時名公交章論薦改著作佐郎知芮城縣為西師深謀密畫多中機宜仁皇嘉其策命諸路兵賦傳以為法移知武陽縣時包拯為尹愛其才明邑人有訟事於府者拯曰既經王宰決矣何用復訴也累遷至

太常少卿

劉元瑜 宋史本傳字君玉河南人進士及第累官至
監察御史上言考課之法提舉河北會軍士謀變元
瑜馳至斬為首者餘釋不問歷轉運使遷右司諫疏
李用和曹琮李昭亮不可典軍梁適不當除翰林學
士范仲淹以非罪貶宜在左右尹洙余靖歐陽修皆
以朋黨斥逐此小人惡直醜正者也既而與靖等相
失因論靖知制誥不宜兼領諫職且奉使契丹辱國
命請加罪繇是論者以元瑜為奸邪歷河中府以左
諫議大夫知青州卒

趙茂曾 武功志洛陽人先為壽春令建中靖國元年

知京兆府孫覽奏更武功崇寧元年春始至官用法
平恕三年治成百姓咸服

席旦 宋史本傳字晉仲河南人元豐中舉進士禮部
不奏名時方求邊功旦詣闕上書神宗嘉納令廷試
賜第歷齊州司法參軍鄭州河陽教授勅令所刪定
官徽宗召對遷御史中丞錢適請廢元祐皇后冊劉
氏為太后旦面贊不可適劾旦陰佐元祐之政左轉
吏部員外郎俄拜御史中丞兼侍讀內侍郝隨驕橫
旦劾罷之都人誦其直帝以其章有指斥語改吏部
侍郎以謨閣直學士知成都府旦政和平治蜀有功
卒贈大中大夫

史珪 宋史本傳洛陽人晉嚴衛指揮使暉子少以武
勇隸軍籍宋祖受禪累官至毅州刺史出為光州轉
都巡檢使征太原失律授行軍司馬復召為右衛將
軍領平州刺史督浚惠民河自尉氏達京師九十里
數旬而畢民咸便之

李通志名宦傳開寶間珪為光州刺史會歲饑淮蔡
民流入州境珪不待聞即開倉減價以糶所全活者
甚眾吏民詣闕請植碑頌德者數百人

孟天常山西通志字子履河南人元祐末任壽陽以
能治劇稱興滯舉廢多所建置潞州司戶參軍張山
為之記

程沂 姑蘇志字詠之河南人頤從子紹興閒知崑山
為政中和有古循吏風

康繼英 東都事畧康保裔傳字仲雄洛陽人以父保
裔任為供奉官保裔戰沒特授六宅使順州刺史累
遷馬軍都虞候端州防禦使知渭州遷殿前都虞候
桂州觀察使繼英謂戎人雖內附而終蓄姦謀乃大
索其所反覆者蕩除之於是威震西鄙改建州觀察
使知衛州曹利用貶繼英以姍家亦降為右羽林大
將軍分司久之復左衛大將軍貴州團練使卒年七
十一繼英嚴於馭軍而厚於撫宗族故其卒也家無
餘財

任仲 浙江通志寓賢河南人紹興初以明經進士為
仙居令有治績內遷至禮部侍郎後隨駕南渡遂居
歸安是為吳興任氏時無俸米頌賜田於本邑南靈
山

郭維 浙江通志寓賢河南人父貫官奉議郎終於長
河判官建炎間維徙居四明以北學教授諸生從者
如雲卒葬西湖之原

徐大興 衢州府志字幼立洛陽人幸隆子幸隆仕河
南節度使靖康時死忠節大興建炎元年自轉運判
官遷衢州守撫瘡痍修戰具卻贈遺充積貯及苗劉
作亂大興預知有變與通判史愿率眾遏賊賊趨甌

閩郡賴以安子孫遂居衢焉

英舊司馬光集洛陽人太平興國進士立朝直言多忤權貴由是不得居內終侍御史

任遠宋史任布傳洛陽人有子以父廢廢官司封郎中性恬遠為政亦多善績

邵溥宋史邵雍傳洛陽人雍孫伯溫子仕至徽猷閣待制弟博傳博字公濟值祕書郎有西山集傳仕朝請知郡

袁裕元史本傳字仲寬洛陽人幼孤從兄避難聊城由聊城縣丞避中書掾始建言給重囚衣糧醫藥免籍孥產止令出焚瘞錢後著為令遷開封府判官洧

川縣達魯花赤貪暴民忿擊之斃有司以大逆寘極刑七人連坐五十人裕曰彼自犯衆怒死安可悉歸罪於民議誅首惡一人餘各杖之有差拜監察御史授西夏安撫副使時統部民萬餘於西夏裕與安撫使請於朝計丁給地立三屯使耕以自養又言西夏羗渾雜居悍良莫辨宜驗有從良書者為良民從之得八千餘人官給牛具使力田為農尋調南陽知府召拜侍郎出為順德路總管卒裕以兄有鞠育恩令子師愈推廕兄子仁師愈仕至侍御史

卜天璋 元史本傳字君璋洛陽人至元中為南京府史程思廉辟為憲史聲聞益著大德四年為工部主

事有豪帥奪民產吏不敢決天璋往詢之帥服田竟
歸民以樞密閣伯薦授都事贊其府武宗時遷刑部
郎中有告諸侯王謀不軌者勅天璋執正之獄賴不
寃皇慶初知歸德府有政績陞浙江道廉訪副使到
任閱月以更田制改授饒州路總管聽民自實事無
苛擾民大悅縣以饑告天璋即發廩賑之祭佐持不
可天璋曰民饑如是必俟請而後賑民且死矣竟發
藏賑之火延饒之東門天璋具衣冠拜火遂熄鳴山
有虎為暴移文山神立捕獲之以治行第一陞廣東
廉訪使嶺南地素無冰天璋至始有冰人謂天璋政
化所致云會詔言時政因列二十事名中興濟治策

皆中時病尋乞歸以餘祿施族黨家無贏儲晏如也
卒贈尚書河南郡侯諡正獻

幹勒海壽 浙江通志寓賢字允常河南人後家山陰
剛正有志節拜監察御史劾奏殿中侍御史合麻及其弟雪雪罪惡直聲震中外官至浙東廉訪使
李與忠 舊志字季昌以才德補國子監學正歷舞陽
陝縣主簿

李鑄 元史本傳洛陽人為蓋州同知歲旱徒跣詣濟
源神祠禱之少頃果大雨蝗忽集鑄至田畔焚香祝
天悉徙去衆異之以為誠感比代州民遮道挽留不
忍其去

王碩 江南通志名宦傳河南人延祐初授無為州同知廉潔有幹才不畏強禦嘗檄清理學田搜抉隱漏凡得田一百一十九頃又追積負糧米三百石自是廩有餘粟士得餼養

楊文選 山西通志名宦傳河南人至正間鎮守靈石

公廉慈惠士民愛之為立頌德碑

秦從龍 明史本傳字元之洛陽人仕元官江南行臺侍御史兵亂避居鎮江徐達之攻鎮江也太祖謂之曰聞有秦元之者才器老成汝當詢訪致吾欲見意達下鎮江訪之太祖命從子文正甥李文忠奉金綺造其廬聘焉從龍與妻陳偕來太祖自迎之於龍江

時太祖居富民家因邀從龍與同處朝夕訪以時事
已即元御史臺為府居從龍西華門外事無大小悉
與之謀嘗以筆書漆簡問荅甚密左右皆不能知從
龍生日太祖與世子厚有贈遺或親至其家燕飲至
正二十五年冬從龍子澤死請告歸太祖出郊握手
送之尋病卒年七十太祖驚悼時方督軍至鎮江親
臨哭之厚卹其家命有司營葬

開濟明史開濟字來學洛陽人元末為察罕帖木兒
掌書記洪武初以明經舉授河南府訓導入為國子
助教以疾罷歸十五年七月御史大夫安然薦濟有
吏治才召試刑部尚書踰年實授濟以綜覈為己任

請天下諸司設文簿日書所行事課得失又各部勘
合文移立程限定功罪又言軍民以細故犯罪者宜
即決遣數月間滯牘一清帝大以為能會都御史趙
仁言曩者以賢良方正孝弟力田諸科所取士列置
郡縣多不舉職宜覈其去留濟條議以經明行修為
一科工習文詞為一科通曉書義為一科人品俊秀
為一科練達治理為一科言有條理為一科六科備
者為上三科以上為中不及三科者為下後之濟敏
慧有才辯凡國家經制田賦獄訟工役河渠事衆莫
能裁定濟一算畫即有條理品式可為世守以故帝
甚信任數備顧問兼預他部事人以是忌之謗議滋

起後遂遇害

夏恕 李通志洛陽人謙和有智畧鄉閭重之洪武初以賢良舉累官刑部尚書

劉世英 李通志洛陽人識見超越為鄉里所推服洪武中以人才舉擢都察院右僉都御史

宋賓 李通志洛陽人性剛直遇事果決洪武中補太學生才能為眾所推授清紀郎遷真定知府為政有方吏民信服秩滿陞陝西右布政使

陳敬 李通志洛陽人敦實有行義初授河南府學訓導洪武中以刑部尚書開濟薦試吏部尚書坐事免歸起為龍川知縣會盜起司兵者欲會勦之敬曰勦

則動衆乃與邑人謀密遣人誘其首擒之不煩一鏃
民賴以安未幾詣闕言事稱旨擢吏部侍郎

何淵 湖州府名宦志字澄仕河南人洪武初知歸安
廉介不受餽遺為人所嫉以事誣繫獄邑民沈勝宗
歎曰廉官受辱可坐視乎乃陳其寃願以身代遂得
釋復其官

王秉彝 南畿志河南人洪武中知丹徒縣科差獄訟
各得其平

宋褚公 洛陽志洪武十五年以賢良舉授霸州知州
有圖園長鎖翠畝畝盡生春之謠子子昭美丰儀讀
書樂善洪武三十年以人材舉授陝西參政

高守禮 洛陽志性醇厚及其發論行事剛直不阿洪武十八年以人材舉官應天府尹

張信 洛陽志少喜讀書資敦厚不事華飾洪武十七年以賢良舉授兗州知府

孫賢 舊志通經學諳吏事洪武二十一年以人材舉官陝西參議

司鐸 李通志河南人任清平指揮洪武二十四年開設衛治創置公署築建城壘卓有能聲

李郁 李通志字文弈洛陽人洪武末貢士授臨平縣訓導累遷長沙知府會郡有盜繫獄蔓結不解郁辯証累者若干人召還擢行在兵部侍郎時交趾梗化

郁奉使宣布威德羣情帖息及還賜勅褒獎卒於官
年七十九

羅義 李通志河南府人洪武未嘗詣闕上書乞敦親
恩不報及靖難師起義復上書諫止忤旨下獄及成
祖嗣位即召授戶科給事中仕至湖廣右參議

鄭敏 山東名宦志河南人洪武間知齊東縣恤民勤
政賦役均平以廉幹陞北平知府

劉敏 李通志河南人以賢良舉永樂初授徽州府同
知敏強毅通達以嚴重肅吏慈惠愛民嘗奉命率郡
民數千取材於山敏與民同甘苦早暮經撫甚至民
雖勞胥勸不急敏又性廉約蔬食布衣終始一節及

卒發其裝蕭然郡人慕之如父母云

商賓 府志洛陽舉人任禮科給事遇有大事敢言動中窾會上甚獎其忠祀鄉賢

周濟 明史周濟字大亨洛陽人永樂中以舉人入太學歷事都察院都御史劉觀薦為御史固辭宣德時授江西都司斷事艱歸補湖廣正統初擢御史大同鎮守中官驕橫勅濟往廉之濟變服負薪入其宅盡得不法狀還報帝大嘉之已巡按四川威州上官董敏王允相讎殺詔濟督官兵進討濟曰朝廷綏安遠人宜先撫而後征馳檄諭之遂解十一年出為安慶知府歲比不登民間鬻子女充衣食方舟而去者相

接濟借漕糧以賑而禁鬻子女者且上疏請免租詔
許之全活甚衆又為定婚喪制禁侈費愆嫁葬期者
有罰風俗一變饑民聚掠富家粟富家以盜劫告濟
下令曰民飢故如此然得穀當報太守數太守當代
爾償掠者遂解散濟卒官民皆罷市巷哭云
張忠 府志洛陽人宣德丁未進士任監察御史剛正
不苛持法平允陞山西按察司副使
孫鐸 貴州通志洛陽人學博經史尤善訓詁屢辭徵
辟正統間嘗典普定衛學訓勒迪課士以科第進者
多出其門御史沈衡辟署貴州宣慰司學自製詩文
送之著有普定衛志一卷

何瑛 貴州通志河南人景泰間任平壩衛指揮廉慎
公勤凡城池廨宇祠廟道路修治一新遷都指揮僉
事

畢亨 府志字文亨洛陽人景泰甲戌進士御史陞福
州守擢應天尹所至以廉能稱轉巡撫糧儲都御史
孝宗訪地方官之賢者中貴以亨對上識之於屏亨
知之曰大丈夫受知主上可假中貴人口哉遂以疾
乞骸骨歸

劉震 山西通志字伯威洛陽人景泰七年任檢次縣
撫民以恩尤慎於刑獄而豪強讐服盜賊自化祀名
宦

潘瑄 府志字廷璽洛陽人天順庚辰進士任清豐令
有羣盜殺人不得情實瑄夜置賊於空室而匿人以
聽其語具悉賊狀遂伏法尋擢御史督長蘆按遼東
所與除皆闕國家大計發奸摘伏尤稱神明云
翟瑄 府志字廷瑞洛陽人天順甲申進士拜開化尹
循聲懋著民為立去思十事碑累擢僉都御史巡撫
雁門劇賊王良李越謀不軌瑄督兵擒之獻闕下陞
南京都御史轉刑部尚書卒於官
翟廷蕙 府志字秀夫洛陽人成化丙戌進士授御史
按山海軍民載之按甘涼甘州亂廷蕙兼程往軍士
皆露刃喧呼將士咸惶駭廷蕙以理法折之誅其首

惡州境悉平再命按蜀貪吏望風解印綬陞副使士大夫合數百人繪圖採謠將上其事為忌者排擠遂投閒

黃端 甘肅通志河南人成化中初改蘭縣為州知州事公署學校皆其創建事集而人不告勞

張文 府志字道顯洛陽人成化辛丑進士歷官御史初按陝西持風裁雖同鄉不少徇監試事拔李夢陽於落卷中魁多士當時頗中飛語會滂陽登會膺為一代名流人始服其鑒時劉瑾用事人爭附文獨不受餽不答書為瑾所憾仕終太僕寺卿

王濬 江南通志字文深河南人成化十年以御史諸

涇縣丞鋤強植弱均賦役通錢法學校壇廨橋梁多
所修建

史簡 府志字公鑒洛陽人成化辛丑進士自行人遷
御史孝宗嗣位庶政維新簡彈劾不避權勢直聲大
震嘗兩出按事皆以嚴明著譽出知蘇州府遷陝西
參政所至事無留滯轉山西布政卒

吳瀚 通志洛陽人正德辛未進士累官都御史巡撫
保定時中官廖鵬擅威福流毒河陝既敗獄久不具
瀚抗疏論之遂寘於法其在保定立堡置戍敵不敢
入畿內晏然卒於官第瀛鄉會俱瀚同屬官至監察
御史子三省三聘俱舉人三樂見後

俞鼎 武功志字國器洛陽人任武功令能使諸生亡
犯所令至號整齊六年遷鎮安知縣有政績尋改成
寧再遷甘肅行太僕寺丞

張瀾 府志字道夫洛陽人宏治壬戌進士初授刑部
主事歷轉臨鞏道劉瑾用事關中瑾故里瀾行瑾託
以家事瀾抵任不阿坐忤瑾淹滯後為江西按察使
會逆濠謀不軌瀾與都憲孫燧憲副許逵同心殉國
寧府樂工秦榮毆斃庠生康昭凱匿寧府中有司莫
敢捕瀾率健兵詣府索得之擬以辟大干逆濠怒瀾
入覲濠密令容刺瀾防少疎中盡於蟹湯遂不能言
殞於途

王致中 山西通志名宦洛陽人正德間潞州舉正教
人有方講學不倦

陳相 浙江通志名宦洛陽人正德中知崇德縣為人
剛果時中貴用事其黨至邑者賂遺之相獨不為禮
一切裁抑巡按廉得其狀有不畏彊禦之稱

閻禮 節黎良所撰傳字用和洛陽舉人正德間授延
安府同知延安密邇西陲素稱難治禮至更張善治
百廢一新卒已回賊猖獗巡撫鄭公見禮喜曰有閻
同知賊不足平也禮受任即行遇賊斬將奪旗追至
秦州生擒賊首田迪餘黨悉平旋晉治中年五十有
五卒於官

馬汝彰 江南通志名宦河南人嘉靖初知武進年少
宰劇邑政務填委決之如神賦役多所更定民甚便
之

吳三樂 府志洛陽人嘉靖辛丑進士初授翰林院庶
吉士緣父瀚任都御史例不得列臺省遷兵部主事
後陞湖川兩省提學衡文責正宗獎士先實行士習
為之丕變累官大理寺卿轉通政使

邢泗 府志洛陽舉人任信陽令公正不阿糧不加耗
讞不酷刑有部使者貪黷而復過縣峻於督責泗不
能堪乃嚴譎行臺門絕其薪水列其事跡欲上之部
使者大窘願署一解忿狀薦章則首列泗曰大丈夫

舉事止則止耳安用狀為如斯之薦屑之手啟門如
初致政歸

荀天常 舊志舉人官戶部員外列上考孫虞龍蒲州
知州虞夔安化州知州並廉直有祖風
劉衍祚 山西通志名宦字淑嗣洛陽人嘉靖庚戌進
士任平陽司馬時南北用兵其冬地大震城市為墟
飢民聚為亂而郡守入覲衍祚代篆築城修廨慎守
封疆復開樊家河為永利渠築石堰障水溉田數十
頃郡人建祠祀之累遷固原兵備道一夕大星亂落
人馬皆佈及明敵大至衍祚調度當機敵失利去不
敢復窺涇原終浙江參政年九十五著有怡真軒記

曠然臺說初服諸社詩琴棋書畫譜行世

史官 舊志嘉靖癸丑進士除館陶令擢御史轉知鳳

翔饒州二府所在有惠政

方時學 府志字敏之洛陽人嘉靖癸丑進士初授安

慶府推官擢知東昌府百廢俱興會景藩初封一切

供億時學酬應曲當免於繹騷後為忌者所中乃歸

里

溫如春 通志其先本藩府儀衛司人從王來洛後入

籍為洛人至如春中嘉靖癸丑進士任清豐縣知縣

時飛蝗害稼下令捕蝗易粟蝗遂滅陞湖廣按察使

會景藩出封德安守闕南狃賊犯順討平之遷福建

右布政使第如璋

俞信 舊志舉人知汝上縣捐俸恤貧士賑窮民性尤廉潔不苟卒祀鄉賢

楊士廉 府志洛陽舉人歷任臨洮府知府開河州水利清沿邊軍餉洮民思之

李之本 府志洛陽舉人任漳縣令有巨盜二十餘過縣邏者執獲訊之有文引皆諸武弁之赴京襲職者之本熟思良久取文引閱之而令盜各報年甲不合巖詰之皆吐實蓋劫殺諸蔭襲持其文引借以護身耳擢代州牧

侯宜正 舊志進士運同明子歷東昌知府治聲冠一

時卒祀鄉賢

許乾 舊志字伯貞嘉靖乙丑進士任河間推官擢御史所在有聲介節不苟以忤時相左遷永平知府楊松 通志洛陽人嘉靖乙丑進士任御史巡城時中貴黃雄以番休日私出微子錢鬪於市兵馬白松監校詭以旨召松驗無實召劾奏雄亦入辯穆宗以松誣奏削籍卒於家

董汝豫 陝西通志名宦字四溪洛陽舉人為神木令邑近邊士鮮學汝豫立社學作養文風振起又勸民植穀製紡車教以織作至今呼董公車祀名宦沈應時 通志河南衛人字子易嘉靖庚戌進士兵備

海上值嚴嵩私人趙文華為總督侵軍儲數十萬事
敗嵩囑從寬應時勘報務盡法觸嵩怒遷涼州參議
能先機料敵敵不敢犯既撫西夏于教忽洞小松山
白城子屢以捷聞累擢戶部侍郎時張居正當國以
應時不附已遷南工部尚書歲餘乞歸

劉贊通志字子禮洛陽人嘉靖庚戌進士累官吏科
給事中慷慨敢言尤以進賢遠姦為第一義督理三
殿工擢通政司參議以直忤時謫鳳陽推官時權璫
驕悍司陵闔有事皇陵微雨輒擁蓋贊面斥曰此何
地也而擁蓋大不敬璫懼斂戢累遷臨清副使
溫如璋舊志字純甫洛陽人嘉靖丙辰進士累官右

僉都御史按順天鋤豪右發奸伏擒賊黨嗣按蘇松
值倭艘自海洋來如璋順流趨太倉調布諸將擊之
生擒三十六人斬首數百級尋撫保定終撫陝西致
政歸所為詩二十卷有唐人風

李天倫 舊志字叔重舉人官至戶部員外郎八耆傳
云生平拙鈍惟以言不符行是懼祀鄉賢

王傳 舊志嘉靖癸未進士授陽城令守廉政平歷戶
刑兩部郎署出知潞安府妖賊景始者勢猖獗傳設
策擒捕獲其渠魁不煩一鏃而禍亂削平晉山東副
使致政歸祀鄉賢

朱用 舊志嘉靖戊戌進士官刑部主事歷陝西左右

政使以清正有聲卒祀鄉賢

王堯卿 舊志舉人俊之子授隴西令調藁城所至有聲祀鄉賢

李之在 舊志嘉靖戊午舉人授海豐令愛士惠民為一時吏治之冠累官戶部郎中嘗奉命南中地多珍產之在潔已勵操獨不屑意績滿乞歸

李珍 浙江通志名宦洛陽人任金華府同知勤慎慈惠民情允愜

王職 舊志字君任萬歷甲戌進士值時相以園花冬開翰苑白鷹至為嘉瑞言於朝衆皆附會職獨以白贖無色殆厭文勝也冬非花時開先謝必早大忤時

相意除大同知縣又不能事監司僅七月鑄職歸
張以謙通志字本厚洛陽人萬歷乙未進士初任陝
西洋縣知縣開水田八百餘頃知武昌郡郡臨大江
每為濤浪所齧謙捐俸築石為岸延袤十里許永絕
水患陞洮岷副使時督撫將領取虎豹狢獠皮無虛
日百姓苦之謙悉其故置軍役於法百姓獲寧居旋
解任起參湖北道卒

秦道顯通志字如晦洛陽人萬歷乙未進士兄弟五
人同爨以禮部主事備兵海上璫黨王萬經橫索淮
民金錢數百萬逃居海島淮撫構之弗能得道顯誘
擒之一日倭衆十三人失風至寧波武弁欲俘之以

邀賞道顯曰置無辜於死地而因以為功謂情法何
因執不從轉四川參政卒

劉澤演 舊志字子廷隆慶庚午舉人官至靜寧州知
州有政聲壽九十九尚能作楷書應人求請不倦次
年正月三日無疾而逝

劉廣業 府志字維約洛陽人萬歷己丑進士初授工
部主事委監節慎庫史胥無敢干以私歷陞陝西平
鳳副使調固原固原控制諸路為套敵出沒地廣業
日咨兵畧凡山川夷險之形奇分合之勢先機料理
於是兵威丕振敵相戒不敢輕犯又奏築邊垣數百
里單車走塞督工工成賜金晉秩尋卒

李士登 澤州府宦績志洛陽人進士萬歷間任陵川

知縣冲齡筮仕勵清廉精吏治即老練不過也尤加
意作人指授文法士多向風歷官廣西右參政

徐守謙 山西通志名宦洛陽人萬歷壬辰進士任陽

曲縣通敏有吏才先榆次有能聲遂以煩劇調涖之
果斷明肅剖決如流治行大著擢監察御史未仕卒
士民立石識之祀名宦

張應辰 豫州人物攷字環北河南衛人萬歷丙辰進

士擢御史巡視中城有中貴殺人應辰議抵罪大忤
忠賢意後巡按廣東忠賢生祠徧天下應辰獨不行
諸僚謂必不免禍會崇禎立有詔諸僚屬轟然謂緹

騎且至啟門始知忠賢誅諸附忠賢者慄慄懼成詣
應辰請罪後陞都御史撫甘肅曾斬劇寇一千八百
級邊人德之卒於官

吳三省 松江府名宦志字省吾洛陽人由鄉薦為令
萬歷九年遷松江同知再以廉稱兩攝邑事為治不
擾布衣澣濯經旬不能肉食踰六載上計數不免諸
孝廉白其誣僅調兗州

錢守成 常州府名宦志洛陽人萬歷癸未進士知常
州廉明有守意所可者雖寒素固加優禮不可即名
勢赫奕不為動釐察吏弊奸胥斂手政以肅然
郭鳳翔 府志洛陽舉人任衡水令時鄰境妖賊披猖

鳳翔曰待其臨城勦之則已晚乃選精銳迎境上出
賊不敢入境陞臨洮同知再補鄆陽皆著勲績天啟
中流寇肆虐鄆撫勤勦軍需不乏皆鳳翔力也卒於
官

王之鑰 府志字維北洛陽人萬曆戊戌進士授涇陽
令涇多貴族大豪之鑰下車即禁請托捕奸猾治績
為秦省最擢工部主事分監節慎庫往例商預支數
萬金陸續上所需物之鑰洞悉其弊為之嚴禁計銀
立限報完否將置以法由是銀無虧出物皆易辦事
竣餘錢悉歸上一時聲重國都陞東省值歲饑蠲俸
賑貸全活甚衆擢登萊副使原管額兵前官多隱坐

至是清出兵有實數尋以疾致仕

范宗文 府志洛陽人萬歷甲辰進士授陽穀令平易
近人士民戴之累官刑部郎中多平反全活甚衆以
疾歸

董定策 府志堯封子萬歷甲辰進士初任真定府推
官獎廉懲墨不畏疆禦以最召為湖廣道御史時朝
士多借講學名陽立以為幟而陰引用其私人定策
薦曹端尤時熙益化鯉諸賢曰古人以學為講後世
以講為學甚至不講學而講事不講已而講人其風
斯下若臣所稱引三賢之學皆實以孝弟忠信為踐
履以閉戶卻軌為閤修出為真經濟處為真學問端

不逾此語切時弊忌者側目定策不為動前後疏凡三十餘上皆中利病按甘肅敵入黑山肆焚掠奏劾大將軍以下數人一時邊將凜肅旌旗改觀西河軍實甲於諸鎮以乞骸請不報興疾至武功卒

郭興言 府志字慎甫萬歷丙辰進士由廣平推官擢都給諫進太僕卿時魏璫擅權其黨郭守仁張凌雲趙大工金興言疏糾之凌雲陰遣人入洛賄興言子舉人永祚求解永祚首於郡邑興言據事上陳寘之法歸里後閩逆震隣郡捐金募兵守陴無懈洛人為之長氣造興言沒而城失守云

邢紹德 府志洛陽人萬歷己未進士仕御史按江西

懲貪有聲

何麓 府志字小翕舉人初任儀封教諭未期以才擢
沁水令決晉藩疑獄十餘年不結者數日定案以憂
歸歷補山陽翼城靈壽三縣當山陽徇賊犯境設伏
以待徇經其創終麓之任不敢再犯致政歸宦橐蕭
然祀鄉賢孫圭如柏如玉如江如俱進士

郭維寧 府志字懷德舉人任壺關令邑為窩盜藪執
首惡除之遠近稱快遷石屏州知州未任卒

董維城 府志字岱州舉人歷官陽穀令薊州知州所
至有惠政引歸持身教子邑中有荀淑之譽
甯連芳 通志洛陽人貢生任羅山訓導言行冠裳一

表諸古學問必軌於正一時遊其門者皆稱名彥
潘倬 通志洛陽人天啟壬戌進士由兗州府司李擢
順天巡按監察御史操履清潔解任後囊橐蕭然惟
圖書而已

王俊 府志洛陽舉人知海門縣有惠政以廉稱三子
俱弱冠薦賢書有三鳳齊鳴之稱孫之翰進士
董義行 舊志崇禎壬午舉人知宜春縣撫民愛士士
民思之

郭景昌 通志字仙岩洛陽人明崇禎戊辰進士由山
西河津知縣擢御史巡按山東劾首輔悞國疏凡七
上忤旨被逮尋赦歸 本朝徵為廣東嶺南道參政

居官清慎尤篤愛桑梓明季洛中連歲大祲百姓六
入河北流離載道景昌時寓河陽捐貲賑濟全活者
萬計歿後洛人思其德立碑於瀘水東通衢祀鄉賢
張雲翼通志字鵬程洛陽人明崇禎癸未進士國
朝順治初授邯鄲知縣歷任鞏昌府知府所至多惠
政人皆尸祝著有四書講義行世

郭一鷗通志字裕九洛陽人順治丙戌進士任萊州
司李多所平反擢禮部主事以建言被譴尋復原官
未幾遷浙江杭嚴道僉事時軍需匱乏以勞瘁卒祀
鄉賢

董篤行府志字天因洛陽人順治乙酉丙戌聯捷進

士由庶常歷任都憲豈弟待人衆服其量立朝孤介
處事謹慎其行事詳呂兆所撰墓誌見藝文

張彥珩 府志字九如洛陽人有才名順治己酉丙戌
聯捷進士由戶部分司歷興化知府尋由按察晉楚
中藩司屢樹懋績有冰蘖聲著有守興記籌瓊略行
於世

郭一鶚 通志字元廣洛陽人順治己丑進士由庶吉
士歷任陝西右布政使廣東左布政使性沈毅能決
大疑

朱國泰 通志字懷雙洛陽舉人初任黃州別駕權稅
惟求解額以清廉晉定番州牧歸里後施德於民里

人誦之祀鄉賢

蕭應聘 舊志舉人授阜城今大著循聲擢部曹出知
江西臨江府晉本省驛鹽道調山西巡道歸籍卒應
聘性至孝居父母喪三年未嘗御酒肉輕言笑人以
是多之先是豫省漕糧本屬徵銀買米起運康熙十
五年因需用兵餉題准改折至二十一年京師以
米石不敷仍令河南等處買米起運越境採辦一時
官民重困應聘陳於當事詞甚剴至豫撫王日藻即
主應聘言疏請照現例改折一時便之以倡議由應
聘咸歸德焉會城學宮有碑記

何玉如 通志字璞公洛陽人順治乙未進士任浙江

錢塘令為政慈惠創建育嬰堂蓄乳母哺棄兒嚴禁
溺女銅婢復築塘建壩清丈緩徵尋陞保定同知境
內盜賊屏跡撫臣委署口北道事治如其初後陞山
西大同知府未抵任卒康熙四十年祀鄉賢
杜之璧浙江通志河南人順治初任處州推官廉約
恬靜案無煩牘有刑措之風

李滋發舊志貢士順治五年授旌德令時徽寧士賊
為亂鄉民郭二導賊入旌界焚掠村落官兵又串合
書吏誣良求賂為害尤劇滋發悉其弊選練長數十
編竈丁屬之聽其指麾以備緩急賊至親驅練長擒
捕逾年殆盡

董昌言 府志洛陽舉人任扶溝教諭值河決捐俸拯
救民多全活補新野有兄弟構訟者至情化導咸感
泣歸

范芝 舊志字雲根舉人任南樂安肅兩縣令釐剔積
弊歲省民間金錢無算擢刑部主事與修律歷後陞
陝西莊浪道第蓋遵化知縣

楊鑣 陝西通志洛陽舉人任麟遊有應變才滇黔之
亂凡輓運重役極力擔荷為民籲免岷山賊嘯聚檄
到縣鑣即夕定謀率鄉兵殲之陞遼陽知州

袁拱 龔森林文集先生姓袁氏諱拱字紫臣號菜園
一號補齋派出汝南其先世於明永樂中自山西洪

洞縣遷洛陽之小翟庄遂占籍為洛陽人五傳諱斐者自翟庄遷金墉故址之有曰金村邑中稱金村袁氏又四傳至先生之王考曰存煥考曰文增文增子一人即先生也先生幼穎異長而肆志學問屢試冠其軍壬子選拔入上舍戊午登賢書壬戌成進士選庶吉士丁卯改兵部車駕司主事時逆藩甫平各省郡邑軍書士卒糧饟往來之道有孔道而暫撤者復有間道新設者費緡以百萬計所待權核之案上於部積且如山先生平時考覽周悉天下津要扼塞與夫城郊道路遠近之形勢或留或裁無不中肯綮時樞省幾宜大政咸於先生取決焉先生具幹濟才於

此見一斑矣越一年奉命監督海運倉倉故邇天府而究黠胥吏盤踞久向時京署胥吏暱於官官且緣之以為奸以故無以過被懲者先生特嚴正有犯輒笞之一時恟恟將槩去特見先生均出入無纖芥染遂以帖然尋以外艱歸服闋補本部督捕司主事晉職方司員外遷戶部浙江司郎中以例外轉除廣西右江僉事時與先生同官者才能或不及先生什伯之一顧皆得善地以去先生以常調獨險且遠蠻江瘴癘之鄉多畏沮無人色先生意泊如也且曰誰非赤子遠方一隅之人詎獨不可漸育於

天子之德化視司事者之能否何如耳泣官日教養
舉其大者先焉粵西之俗育子女輒質賣之但以覲
利雖離析其骨肉不恤也又多逸男而勞婦丁壯嬉
於室其荷擔捆載於道者婦參半焉甚至興築力役
官府之徭皆以婦人應之先生念習之澆莫踰此者
為申柳子厚在柳州時計傭抵直之約子女質於人
者工滿聽歸並禁過其士者攜之他徃為男婦分職
業男耕則婦饁男操作則婦織紡婦女不得輒溷走
市肆俱著為令於是粵之俗為之一變又粵西故徭
人出沒之區其人性狠戾穴重山洞中不可踪跡每
昏夜於川原村落間掠民間什物子女畜產之屬或

白晝亦行之無忌民間所失邀其家以錢償取不稱
意格不發與競隨揮之及聲於官官知徭人橫不能
捕捕亦不可得也先生至採問甚悉廉諸洞中之強
而黠能號召其屬者招之來給酒食撫以溫言以至
誠動之知可用為製衣冠使別其伍名曰徭長令戒
諭各所屬勿更侵擾吾民每朔望期集徭長於庭詢
之以止放火白者賞若干止掠人者賞若干得實無
吝賞或誣罰亦隨之惕息無敢動者四境晏如粵民
至今尸祝先生當事者因舉祀先生於柳之名宦祠
然而先生之視事甫四月耳先是先生除官之日將
板輿奉母太恭人段以行不果至是以訃聞先生即

日匍匐歸結廬墓次屏絕外營自是不復有出山之志矣癸未之冬

聖祖仁皇帝西巡迎

鑾駕於潼關

仁皇帝以舊郎官識之尋

命侍衛問征噶爾旦辦事有名否人謂先生獨被慰問宜隨

鑾俟進止先生輒引歸曰小臣以觀

天顏而來非有他也蓋先生之志決之早矣先生之言曰江湖廊廟期於鄉國有裨何岐視為哉會歲之乙酉河郡奉檄以備撥賑將貯所截留漕穀一百二

十萬石於洛陽先生以事有難行者移書司諫蘧洛
令錢君肇修其略曰積儲誠急務也然須收放流通
每年收放又須酌城邑大小戶口多寡春可借出若
千秋可收還若干總倉廩之儲與土地所出約五六
年間可以收放一週始無紅朽之患若積穀百餘萬
石於一邑之中洛陽雖號十萬戶保無逃亡遷徙可
以比戶分給乎即比戶分給而一歲所產雖豐登不
過數十萬石此數十萬石之穀可盡使之入倉乎出
放不週則陳因蠹爛病在官按數分給則罄囊不濟
病在民病在官賠累之害可畏也病在民竭澤之痛
可忍乎且積穀原以備用也設天災流行將協賑於

數百里外此間舟楫難通自須車運而車牛能盡運乎即令保甲權押逐戶出車恐待賑之民未充飢腸而轉運之民已死奔走矣愚以為自汴入洛自洛入秦東則汜水滎陽中牟鄭州西則陝州靈寶澠池閿鄉沿河州縣十餘處皆建倉廩貯穀為備不惟河南之民賴以滋養即山左歲歉滎鄭中牟之穀可以順流而下秦中有災陝靈之儲既免砥柱三門之險亦可溯流而上此誠三省之利也故莫如分貯為便司諫得書即據以上

間洛陽乃貯十分之二而沿河十餘州邑皆分貯焉分貯之後自以出陳易新為利矣當事遂令每年按

花戶地畝銀數分給先生曰田多者食穀多田少者食穀少將無田者偏嗷嗷也於積穀備賑之意不相戾乎即曰此特為豐年計若荒則自應均之夫豐則厚責之富者或遇凶歲富者之口較多富者之賦較重而乃令與貧者按戶較升斗是貧者不死荒而富者死荒也隨奏記撫軍鹿公為陳貧富均沾經久不弊之道乃得任取民便於今為例仁人之言其利溥哉觀於此見先生之居鄉不忘民瘼其所規畫與夫居官時試之而有驗者若一轍也先生之才良大而未竟其用惜哉先生性至孝居二人喪慘墨毀瘠人有不忍見者居鄉尚朴素與人和易陰行善事甚多

好成就後學教子弟有成法所著詩文皆可誦藏於
家壽六十有六自成進士凡在官者七年林下者踰
二十年子四長昌齡貢生次昌瑞監生先卒三良謨
癸卯舉人截選知縣己酉山東同考官以文行著於
時四昌譜監生孫一人句余掌大梁書院教事時門
下士也己丑科進士余既攝官於洛又因句之舊知
先生為詳故為之傳歸之以俟史氏之論定焉贊曰
先生遭際清時歷官奉職若祇兢兢循謹者之所為
然而先生之才其試焉而效者綜理裕如不震不竦
舉夫智名勇功率不足以駕而上之此以知先生之
才之可以大用也然而先生卒不竟其用且以先生

之時之地固非連蹇結約一意棄去決然長適而不
返者之比應獲大用而用卒以不竟則意者天焉非
人之所能為耶抑吾聞之先生在樞部時為丁卯北
闈同考官以薦士忤主試者公實無私爭之詞色俱
厲有人所不能堪者又以監武闈試箭忤府尹某某
旋為少司馬意快快先生終不為屈其官僉事也同
城制閩某驕恣不法值山呼之期文武百僚咸集某
拜疆直逼

龍亭案前先生昌言於衆曰粵西雖萬里外
天威不違咫尺人臣拜下古今定制有敢武及殿陛
者以大不敬論百僚相顧失色某大慚而退蓋先生

之性剛正不苟合視權要蔑如也先生既不能容人
當亦不能容於人先生用矣而七年在官卒不得大
用先生卒亦不能貶其性以求用固宜乎其用之不
竟也然先生以憂歸決志不出先生未嘗一明其故
於人人亦罕知先生者此則先生之所養者熟識真
守定尤士君子之難能而可貴者歟或者見先生林
下日以陶陶自得比之嘉遯者流其猶淺之乎論先
生矣

楊明遠 舊志字修實康熙甲戌進士授四川長壽令
地經張獻忠屠刈之後民人多由湖南僑籍者健訟
不休名遠懇切化導之數月而訟庭寂然胥役半乞

歸農以去官署供億舊例出之里下自名遠於其地
禁革殆盡後來所在無以應起滋擾者實名遠請之
先也

趙斗文 舊志字魁字洛陽人子時躍分巡河決時斗
文以知書善射受知康熙初保薦隆州守備三署州
事獎勵士子勸課農桑治聲大著

李學祜 節方苞所撰墓誌字餘三洛陽人雍正丁未
進士由翰林改御史巡察直隸廣順大三府官吏凜
凜雖大府亦嚴憚焉轉兵科給事策封安南後刑科
掌印給事中轉四川建昌道自打箭鑪至西藏民獠
咸懷治行甲兩川金川諸土司相仇殺學祜會諸將

巡視閩論皆駢首革心調江蘇糧道會揚淮水災制
撫委學裕拯濟起瘠甦困數百萬人遷按察使明允
無留獄擢安歲藩司卒於官乾隆四十年河南巡撫
徐績題請祀鄉賢

郭世奇績通志字震標洛陽人乾隆丁巳進士任廣
東吳川令前官遺案累百世奇以十日審結嘗簡從
下鄉鎮集長幼教誨之曰使其畏吾法不敢犯毋使
其犯吾法不能逃也越三年無犯徒以上罪者署化
州牧有聲卒於官

曹汝奎舊志字崑巖拔貢分發浙江知縣奉檄清丈
黃巖地畝悉心釐畫具有成規委察戶口災傷徧歷

山溪輿馬不及輒徒步省視以狀聞得賑貸全活頗
衆以勞瘁卒於官子瑩拔貢生
董萬戶 舊志字封侯貢生任江南令其地環山多虎
萬戶至無虎患人異之立社學陶成多士勸民開國
種蔬咸賴為利丁艱歸里瘡中僅存石數片人擬
為顛

邢偉 王志字大士洛陽人進士歷任政和侍郎令有
治績囹圄空虛治什邡時江某兄弟爭產偉以天性
動之汪遂慟哭相讓致仕後主講嵩陽紫羅二書院
成就百餘人

李學峻 舊志字次山洛陽舉人安徽方伯學裕胞弟

幼時時公已沒事母以孝著後為普安令其地獠民
雜處素號難治峻內靖其民外撫諸獠德威並著四
境帖然

吳居易 蘊志字右白洛陽藥人任延津教諭循編善
誘士化其德解組後授徒洛中以成就後學為已任
如袁句劉崧嶽邢文雄李滋深等皆其門下士也所
著有兩孟說文等書藏於家

任光業 績府志光業字顯齊洛陽人進士仕廣東增
城令凡九年聽斷精敏胥吏皆不敢欺人懷其惠及
光業已卒增城有計偕入都者輒迂道至洛詢其墓
所在泣拜乃去

李煥 續府志煥字堯章洛陽人乾隆甲子舉人初任
裕州學正勤於課士擢曲阜令推抑豪強有治聲務
為休息園囿空虛兩築堤一疏河民皆不擾以是德
之會鄒縣被災調勘以實上陳得厚賑全活尤衆
郭光曾 續府志曾字貽則洛陽人以明經任武安教
諭諸生月課必集明倫堂教誘備至由是士風丕振
若王廉使時熏亦及門之選也著有鼓山課士錄
郭如莪 續府志如莪洛陽貢生授禹州訓導遷山西
垣曲令嘗雪冤獄有洛聲
李淑沆 續府志淑沆字天泉洛陽人乾隆丙辰舉人
居父母喪哀毀讓產於兄弟所為詩文尤為學者所

推著有城東集來青軒集各一卷任甘肅狄道州州
判分駐沙泥驛地處偏隅人不知學乃擇其穎秀者
獎進之辛卯歲不登親歷崎嶇查勘戶口請賑又自
煮糜佐之全活甚衆俄以疾解任民遮道而送者幾
千人家居十餘年日坐小齋手不釋卷卒年八十有
二

李燕 續府志燕字蘭臯洛陽人安徽布政使學裕第
三子乾隆己卯舉人辛巳進士初官山東濟陽令因
邑有水災勘賑以數騎從窮鄉僻壤無不周歷日乘
馬行泥淖中由是民思其德量移歷城擢德州牧值
壽張逆匪之變登陴設守具乃送其老母於濟南會

故大學士舒公統兵誅勦軍需罔不備公以為才賤
平薦守濟南遷濟東泰武臨道因按部卒於工次
董爾性續府志爾性字去習洛陽人山西垣曲縣令
鑿渠灌田數百頃民謂董公渠擢知沁州勞心撫字
丁父憂旋里康熙關復除廣東欽州距家萬里寇警
時聞爾性盡力守禦并練鄉勇擒其渠魁一方賴以
保安事

聞擢員外郎未及赴補卒

李學深續府志學深字淵如洛陽人由保舉任廣東
隆井場大使喜讀書好獎成後進洛下知名士往往
出其門場瀕海每颶風大作或有覆溺之患前官視

為良途吏緣為姦學深按額給引按引給鹽郤貽金
除陋習由是商無滯抑績滿將以勤薦遂致任歸懷
其惠者有贐皆力卻之卒年七十九

劉崧嶽 續府志崧嶽字中峙洛陽人乾隆己卯舉人
父病醫曰糞苦則無虞崧嶽遽取膏之授徒里門勤
於訓迪士不遠數百里負笈至嘗客京師忽心動亟
歸則母病殆獲視含殮官闕鄉教諭聞洛中無歲寄
貲買穀數十石以賑擢昌黎令悉除弊政素無義學
為創立講堂延名師仿白鹿鷲湖遺規又出貲籌策
以垂永久多士於今賴之辛丑
駕幸盤山崧嶽奉檄治道路

賜緞一疋癸卯地生蝻子崧嶽捕之盡歲則大熟若有神助焉縣北二十里有水岩佛寺在山之巔高數千丈會秋旱崧嶽徒步往禱即雨歡聲如雷民建生祠為詩勒石未幾以呈誤罷去士民悼歎多有垂淚者

董之銘 續府志之銘字西宗洛陽人篤行元孫也舉乾隆己卯鄉試庚辰成進士累官福建道監察御史奏請捐納知府不得以繁缺補用奏

旨所奏是又嘗專摺參奏正一真人風采嚴正少警敏贍於文詞惜文集散佚今所綴拾者皆燼餘也

黃寶鼎

續府志寶鼎字玉珥洛陽人少有才畧國初

除江南靈璧令兵荒之餘民多流離多方招徠民益
以安祀靈璧名宦祠子肇新字聿周歷官山東壽張
縣知縣雲南尋甸州知州兵部武選司

曾同章覆校李錫爵校對

洛陽縣志卷五十一

洛陽縣知事曾炳章重印

清舉人陸繼輅同纂

洛陽縣知縣魏襄

逸民

董公 史記高祖本紀漢王南渡平陰津至雒陽新城

三老董公遮說漢王以義帝死故漢王聞之袒而大

哭遂發喪

种岱 後漢書种暠傳字公祖洛陽人好學養志舉孝

廉茂才皆不就後公車特徵會病卒初岱與李固子

燮同徵議郎燮聞岱卒痛惜甚乃為上書曰故處士

岱淳和達理助悅詩書富貴不能回其慮萬物不能

擾其心稟命不永奄然殂殞昔先賢既沒有加贈之
典周禮盛德有銘誄之文而岱生無印綬之榮卒無
官諡之號雖未見忠效用而為聖恩所拔遐邇具瞻
宜有異賞朝廷竟不能從

仲長子光 王績仲長先生傳字不曜自云洛陽人唐
書王績傳仲長子光者亦隱者也無妻子結廬北渚
凡三十年非其力不食績愛其真徒與相近子光瘖
未嘗交語與對酌酒懽甚

武攸緒 唐書本傳武后兄子也恬淡寡欲好易莊書
變姓名賣卜得錢輒委去尋授太子舍人遷大都督
府長史后革命封安平郡王固辭官願隱居后遣其

兄攸宜敦諭卒不起盤桓龍門少室闕冬居茅椒夏
居石室所賜珍貴器塵積不御也市田潁陽使家奴
雜作自混於民中宗初以安車召苦祈還山詔可尋
又以璽書迫之既至帝敕有司即兩儀殿設位行問
道禮攸緒至山帔葛巾更衣冠就當班再拜賜予無
所受尋還山俄而諸韋誅武氏連禍惟攸緒不及睿
宗復詔拜不就仍賜嵩山舊居令州縣存問
盧鴻一 舊唐書隱逸傳字浩然本范陽人徙家洛陽
少有學業頗善籀篆楷隸隱於嵩山開元初遣幣禮
再徵不至五年下詔鴻一赴徵六年至東都謁見不
拜宰相遣通事舍人問其故奏曰臣聞老君言禮者

忠信之所薄不足可依山臣鴻一敢以忠信奉見上
別召昇內殿賜之酒食詔曰盧鴻一應辟而至訪之
至道有會淳風爰舉逸人用勸天下特宜授諫議大
夫鴻一固辭又制曰昔在帝堯全許由之節緬惟大
禹聽伯成之高則知天子有所不臣諸侯有所不友
遊之時義大矣哉嵩山隱士盧鴻一抗迹幽遠凝情
篆素隱居以求其志行義以達其道雲臥林壑多厯
年載傳不云乎舉逸人天下之人歸心焉是乃飛書
巖穴備禮徵聘方佇獻替式宏政理而矯然不羣確
乎難拔靜已以鎮其操洗心以激其流固辭榮寵將
厚風俗不降其志用保厥躬會稽嚴陵未可名屈太

原王霸終以病歸宜以諫議大夫放還山歲給米百
碩絹五十匹充其藥物仍令府縣送隱居之所若知
朝廷得失具以狀聞將還山又賜隱居之服并其草
堂一所恩禮甚厚

張彪 全唐詩傳潁洛閒人天寶末將母避亂杜甫詩
所稱張山人者是也杜甫寄張山人彪詩凡三十韻
中有句云獨臥嵩陽客三遠潁水春又有靜者心多
妙先生藝絕倫草書何太古詩興不無神曹植休前
輩張芝更後身數篇吟可老一字賣堪貧等句蓋潁
洛靜者有道而隱者也

元延祖 唐書元結傳河南人亨子三歲而孤仁基敕

其母曰此兒且祀我因名而字之遠長不仕年過四十親姐彊勸之再調春陵丞輒棄官去曰人生衣食可適飢飽不宜復有所須每灌畦掇薪以為有生之役過此吾不思也安祿山反召結戒曰而曹逢世多故不得自安山林勉樹名節無近羞辱云卒年七十六門人私謚曰太先生子結

郭延卿

東軒筆錄洛陽人居水南少與張文定公呂

文穆公遊二公相繼作相更薦之未嘗出仕葺林亭藝花竹足跡不及城市至是年八十餘矣一日文僖率僚屬訪之去其居一里外即屏騎從輿蓋不告名氏洛下士族多延卿未始出蓋莫知其何人也但欣

然相接道服對談而已延卿曰陋居罕有過從平日
所接之人亦無如數君者願少留於是陶尊果藪
進文僖愛其野逸為引滿不辭既而吏報申牌牙兵
列庭中延卿徐曰公等何官而從吏之多也尹告之
曰留守相公也延卿笑曰不圖相國肯顧野人遂相
與大笑既又曰尚能飲否文僖欣然從之又飲滿數
杯日入辭去延卿送之門顧曰老病不能造謝希勿
訝也文僖登車茫然自失翊日語僚屬曰真隱者也
彼視富貴為何等物邪歎息累日
种放 宋史隱逸傳字明逸洛陽人沈默好學與母俱
隱終南山以講習為業從學者甚眾淳化初陝西轉

運宏惟幹言其才行詔使召之其母恚曰常勸汝勿聚徒講學身既隱矣何用文為果為人知而不得安處我將棄汝入深山矣放稱疾不起太宗嘉其節詔京兆賜以緡錢使養母不奪其志咸平元年母卒兵部尚書張齊賢薦於朝詔徵不至明年復召至京師以幅巾見帝命坐與語大悅即日授左司諫直昭文館未幾乞還山命館閣官宴餞於瓊林苑帝親製詩送之放性喜幽僻終身不娶景德大中祥符間屢召至闕下俄復還山暮年乞徙居嵩山天封觀側帝因命內侍就興唐觀基起第賜之及卒詔贈工部尚書

李瀆

宋史隱逸傳字長源洛陽人淳澹好古博覽經

史不求仕進嘗往來中條山中不親產業所居木石
幽勝談唐室以來衣冠人物歷歷可聽真宗時使使
召見辭以疾卒不起遣內使勞問令長吏歲時存撫
天禧三年卒詔贈祕書省著作佐郎仍勅州縣存卹
其家

郭雍 宋史隱逸傳字子和洛陽人父忠孝官至大中
大夫師事程子著易說雍傳其父學通世務隱居陝
州放浪山谷間號白雲先生乾道中以陝守任清臣
湖北帥張孝祥等薦於朝旌召不起賜號冲晦處士
孝宗稔知其賢每對輔臣稱道之命所在州郡歲時
致問後更封頤正先生

閔交如 溫公詩話交如好治經所為奇僻自謂得聖
人微旨先儒所不能到貧無妻兒不應舉嘗寄食僧
舍僧亦不厭苦之始居龍門山猶苦游人往來多徒
居萬安山屏絕人事專以治經為事凡數十年用心
益苦而去人情益遠衆非笑之交如不變益堅雖非
中行其志亦可嘉也過庭錄嵩山隱者閔交如閉戶
著書不接世事忠宣造其居嘗有字說解
穆廷秀 山東通志流寓河南人遷居章邱明黃老不
樂仕進鄉里稱重熙寧間卒年七十三洛陽王壽卿
題其墓

程忘吾 谷音字自修洛陽人性孝友讀書城東門翰

林元裕之上其言行除禮部郎中自修聞之素家南
去

薛繼先金史逸民傳字曼卿南渡後隱居洛陽西山
課童子書事母盡孝與人交謙遜和雅所居化之年
已老狀貌如少者子純孝字方叔有父風客見者輒
不知其為曼卿以為方叔或詐為父書就取物輒與
之鄉人石玠為御史行部過曼卿不肯見親隣皆勸
之往謝答曰君但未之思耳凡今時政未必盡善舉
劾未必盡公一與往來後有所舉劾將謂自我發之
善者未必報惡者立受其禍其畏慎皆類此壬辰之
亂病沒宜陽

杜時昇 全史逸民傳字進之信安人隱居嵩洛山中
博學知天文不肯仕進承安泰和間宰相數薦可大
用因語所親吾觀正北赤氣如血東西互天不久大
亂天下南北當合為一消息盈虛循環無端察往致
來孰能違之時風俗侈靡紀綱大壞以伊洛之學教
人從學者甚衆

曾同章覆校李錫爵校對

洛陽縣志卷五十二

洛陽縣知事曾炳章重印

舉

人陸繼輅

清

洛陽縣知縣魏

襄

同纂

執術傳

叔服

左傳文公元年春王使內史叔服來會葬公孫

教聞其能相人也見其二子焉叔服曰穀也食子難

也收子穀也豐下必有後於魯國註後皆如其言

伶州鳩

左傳昭公二十一年春天王將鑄無射伶州

鳩曰王其以心疾死乎夫樂天子之職也夫音樂之

興也而鐘音之器也天子省風以作樂器以鐘之興

以行之小者不窕大者不楸則和於物物和則嘉成

故和聲入於耳而藏於心心億則樂窅則不感椒則不容心是以感感則生疾今鐘椒矣王心弗堪其能久乎註明年言驗

虞初 文選註河南人漢武帝時以方士侍郎乘馬衣黃衣故號黃車使者小說醫巫厭祝之術九百四十三篇張衡西京賦云小說九百本自虞初是也

麴聖卿 後漢書方術傳河南人為丹書符劾壓殺鬼神而使命之

龔寬 畫史洛陽人元帝時同毛延壽陳敞劉白陽望樊育六人入畫苑延壽畫人物美惡咸得其真龔寬並工牛馬

杜夔 魏志方伎傳字公良河南人漢靈帝時為雅樂
郎以疾歸後曹操薦為軍謀祭酒參太樂事因令創
制雅樂夔素善鐘律聰思過人至是研精遠考備作
樂器紹復先代古樂夔之力也入魏為太樂令協律
都尉嘗思鑄鐘與柴玉更相毀操令取所鑄鐘雜錯
更試然後知夔為精而玉妄也

張泰

桑馥

邵登 魏志杜夔傳俱河南人皆以師事杜夔研精樂
律文帝時各官太學丞

趙達 吳志本傳河南人少從侍中單甫受學用思精

密謂東南有王者氣可以避難故脫身渡江治九宮
一算之術究其微旨是以能應機立成對問若神孫
攬行師每令達推步皆如其言權問其法達終不語
由是見薄祿位不至初有人難達術為妄者達令取
小豆數升播之席上立定其數驗覆果信嘗過故知
為具食謂曰倉卒乏酒又無佳肴如何達因取盤中
箸再三縱橫之笑曰君家東壁下有酒一斛鹿脯三
觔何以辭無主人慚謝曰以君善射覆故相試耳後
達死孫權索書不得發棺視之亦無所得其術遂絕
孟欽 晉書執術傳洛陽人有左慈劉根之術百姓爭
赴之符堅召至長安惡其惑眾命符融誅之俄而欽

至融留讌酒酣目左石收欽欽化為旋風飛去頃之
有告在城東者融遣騎追之垂及忽去或有兵眾拒
戰或前有溪澗騎不得過遂不知所在堅未復見於
青州符朗尋之入於海島

陰貞 魏書蒧術傳河南人家世為醫與周澹並受封
爵

邱阿口 魏書蒧術傳洛陽人工握槊

張文仲 唐書方技傳洛陽人仕武后時至尚藥奉御
特進蘇良嗣方朝疾作仆廷中文仲診曰憂憤而成
若脅痛者殆未可救頃告脅痛又曰及心則殆俄心
痛而死文仲論風與氣尤精后集諸言方者與共著

書詔王方慶監之文仲曰風狀百二十四氣狀八十
治不以時則死及之惟頭風與上氣足氣藥可常御
病風之人春秋末月可使洞利乃不困劇自餘湏發
則治以時消息乃著四時輕重術凡十八種上之虔
縱官侍御醫慈藏光祿卿

李虔縱 唐書方技傳洛陽人官侍御醫慈藏光祿卿
與張文仲並以醫名

宋單父 異人錄洛陽人能詩善種植之術牡丹變易
千種紅白閒色上皇嘗召至驪山植萬本各色別無
委棄者賜千金歸宮人呼為花師

杜宗 圖繪寶鑑河南人工佛經變相

殷文亮 朝野僉載洛州人為縣令性巧好酒刻木為
小兒衣以繪酌酒行觴皆有次第又作木妓唱歌吹
笙皆能應節飲不盡木小兒不肯把杯飲未竟木妓
歌管連催莫測其神妙也

于僧翰 陶宗儀書史會要河南人工八分與貝冷該
俱擅名江左冷該學元宗書無足取者僧翰師韓擇
木參用篆法故勝之

張倣 書史會要洛陽人善書學張旭

王知敬 書斷洛陽人官至太子家令工草及行尤善
章草

李懷琳 書史會要洛陽人國初時好為履跡嘗倣嵇

叔夜絕交書續帖中有其跡

釋亞栖 書史會要洛陽人喜作字得張顛筆意每論顛云世徒知張之顛而實非顛也觀其自謂吾書不大不小得其中道若飛鳥出林驚蛇入草則果顛也耶此亞栖所以獨得而世俗未可知也

張圖 圖繪寶鑑字仲謀洛陽人朱梁時將軍少穎悟而好丹青善潑墨山水皆不由師授自致神妙尤長於人像其畫用濃墨麤筆如草書顛掣飛動勢極豪放至於服飾儀物則用細筆輕色無一畝仄自成一
家法

僧智蘊

繪事備考河南人工畫佛像人物雄中天宮

寺毘盧像廣愛寺定光佛像福先寺三災變相皆其蹟也周廣順中進舞鍾馗圖於朝賜以紫衣

王處訥 宋史方技傳洛陽人少遇一老父煮洛河石如麪令食之又夢人持巨鑑星宿燦然納腹中覺而心胷開悟因留意星歷深究其旨漢時召為司天夏官正出補許田令擢國子博士與周祖厚及入汴遽命訪得之因問劉氏祚短事對曰人君未得位嘗務寬大既得位即思復讎嗜殺所以運祚不長周祖蹶然太息適將誅蘇逢吉劉銖等家遽命止之廣順中遷司天少監世宗命定舊歷差舛成而未上會王朴作欽天歷以獻私語之曰此歷不久即差因指以示

朴深然之建隆二年欽天歷果誤受詔別造新歷經
六卷御製序名應天歷又以漏刻無準重定水稱及
候中星分五鼓時刻俄遷少府少監太平興國初改
司農少卿判監事六年又上新歷二十卷復拜司天
監卒

王熙元 宋史王處訥傳處訥子習父業開寶中補司
天歷算端拱初改監丞遷太子洗馬兼春官正加殿
中丞景德中授司天少監奉詔纂陰陽事十卷真宗
製序賜名靈臺祕要作詩紀之授監正卒

張贊 圖畫見聞錄洛陽人工畫佛道人物維中有寺
壁

李祐 圖畫見聞錄河南人工畫花竹翎毛名盛一時
邱訥 圖畫見聞錄雒陽人工畫山水體近許道寧筆
氣不逮而用墨過之

任誼 書史會要字寸仲洛陽人官至澧州通判隸書
學蔡邕

宋道 宣和畫譜字公達洛陽人擢第為郎善畫山水
以幽澹簡遠取重於時惟興至寓意而已故傳世者
絕

宋迪 宣和畫譜洛陽人與兄道同榜進士道善畫山
水迪亦能之或覽物得意或寫物創意而運用高妙
如騷人墨客登高臨賦當時推重往往不以名字顯

咸謂之宋復古又喜畫松枯槎老枿森然欲動

范坦 宣和畫譜字伯履洛陽人以蔭補官長於吏事

所至皆以明辨稱善丹青作山水其筆法學闕仝李

成

武宗元 圖繪寶鑑字總之河南人官至虞曹外郎善

丹青長於道釋造吳生闕奧行筆如流水神彩活動

太抵如寫草書奇作也

王瓘 圖繪寶鑑字國器洛陽人工畫釋道人物深得

吳法世謂之小吳生子端世其學

王兼濟 圖繪寶鑑洛陽人工畫釋道鬼神學吳道子

得其餘趣

呂漸 讀書記洛陽人工畫佛像威儀雄偉尤善山水
窠石深得位置

馮曠 圖繪寶鑑河南人工山水體制不類前人自成
一家筆墨蒼老馳名熙寧間

韓若拙 圖繪寶鑑洛陽人善翎毛政和間兩京推為
絕筆

張永 浙江通志方技傳洛陽人為翰林醫學太醫令
李會通同時出其方與會通無異但改煎為散耳散
疾遂愈扈從高宗南渡因家餘姚後登進士至禮部
尚書所著有衛生家寶行世

李慶嗣 金史方技傳洛陽人少舉進士不第棄而學

醫讀素問諸書洞曉其義大德間歲大疫廣平尤甚
貧者往往闔門臥病慶嗣攜藥與米分遺之全活甚
衆慶嗣年八十餘無疾而終所著傷寒纂類四卷活
人書二卷傷寒論三卷針經一卷傳於世

郭敏 圖繪寶鑑字伯達河南人畫人物山水喜武元
直師其意花卉墨竹亦臻神境官至知州

程彥澤 徐一夔洛下遺民傳明道後裔元末自稱洛
下遺民遊五湖得其傳隱於術以神醫名

董倫 書史會要字安常河南人淹該經術善屬文篆
宗周丞

李好古 書史會要河南人官至陝西行省郎中工大

字

賈策

繪事備考字治安河南人工畫禽鳥得飛鳴翔

集之狀嘗為仁和尹有能名

何宜健

通志洛陽舉人仕阜城知縣以病歸遂究心

岐黃之術其效如神凡診視無不立判死生

畢宗義

舊志中丞亨少子精堪輿常過新墳歎曰此

地甚凶後禍纏綿矣主人聞之召地師相質師曰地
似卧牛山水皆合局何以云凶畢曰地形誠如所言
奈牡牛性好舐觸何問其驗曰去穴數步下三尺許
有異物去此則無事矣如其言掘之果得二石卵眾
皆歎服

趙玉璧 舊志精醫術彈指決生死皆中郡邑車馬伺
其門者絡繹不絕

馮國鎮 舊志通幼科與趙齊名年九十餘尚健步壯
者追之弗及子三錫孫松皆庠生世其業著痘疹規
要

王良策 舊志字鳳池由山右奉母遷洛工醫效如神
翟某患背痛三十年矣良策曰是有物須出之為傅
藥拔箭鏃少許翟不知何自來也其他妙驗皆類於
此

祝堯民 虞初新志字巢夫洛陽諸生少以文名明亡
遂棄制執為醫自號薜衣道人得仙傳瘍醫凡諸惡

瘡傅藥少許即愈或有斷脛折臂者廷治無不效人
比之華陀里有被賊斷頭未殊者其子知其神急請
堯民至堯民撫其胃曰頭雖斷尚有生氣有生氣則
尚可治急以銀鍼紉其頭於項既合傅以藥熨以炭
火少頃煎人參雜他藥啟其齒灌之項與鼻有微息
復以熱酒灌之逾晝夜則出聲進以糜粥七日而創
合半月活如故舉家拜謝願以產之半酬之堯民不
受後入終南山不知所終無子其術不傳

陳廷瑞 續府志廷瑞洛陽人生而穎異以醫名然博
覽羣書事叔父養生送死人以是稱之

孫世運 續府志世運洛陽人家赤貧而奉親甘旨無

缺晚習長桑術能辨奇疾活人無算

趙夢麒 續府志夢麒洛陽人武學生性篤厚知醫與人無德色其貧者又從而衣食之有山右曹某婦淇縣崔可義母鳳陽水某皆行乞有篤疾畱而為處方劑病差乃去又嘗為客兒郭楊成娶婦殯温縣劉大漢其好義如此孫科己亥舉於鄉

李進朝 續府志進朝洛陽人善接骨術行之五十年曾不受人一錢其初有徐道士授以方或叩其術則曰吾非能別有神奇但人之骨節短長脈絡通貫無所疑耳

劉恭 續府志恭洛陽人好易兼通六壬奇門有占問

者無不奇驗

郭崑鎮 續府志崑鎮洛陽人官河陰訓導工山水做
北宋諸人又能作懸崖枯樹蒼秀絕倫有虬髯客圖
乃其極筆

郭友龍 採訪冊字雲門官遵義知府善書畫

劉士任 採訪冊字子重舉人能詩尤工畫

郭步溪 採訪冊字濂望歲貢生工詩尤善書畫

邢文雄 採訪冊倬子乾隆壬申舉人多材藝尤善書

少時應學使者試批其卷云真草兩絕母歿以毀卒

史炎如 採訪冊善書畫

趙復奎 趙琮 採訪冊復奎父子俱善醫活人不受謝

次子珍有孝行

潘翊運 採訪冊翊運善醫受富家謝輒以施貧者鄉人德之

潘子俊 採訪冊子俊乾隆甲午舉人官祥符訓導加國子監學正銜著有方書源流攷

孫頤履校季錫爵校對

洛陽縣志卷五十三

洛陽縣知事曾炳章重印

舉人陸繼輅

清

洛陽縣知縣魏襄

同纂

二氏傳

五老 羅泌路史堯將禪舜於是修壇河洛擇良議沉仲月辛日昃明禮備榮光出河休氣四塞越歲仲春率百工沉璧於洛且告禋事陞首山道河渚遇五老而濟焉論語比考讖仲尼曰帝堯率舜等遊於首山觀河渚有五老游河渚一曰河圖將來告帝期二曰河圖將來告帝謀三曰河圖將來告帝書四曰河圖將來告帝符有頃赤龍銜玉

苞舒圖刻版題命可卷金泥玉檢封盛書戒曰知我
者重董也五老乃為流星上入昴黃姚視之龍沒圖
在堯等共發曰帝當樞百則禪於虞

宋倫 列仙傳洛陽人厲王甲辰歲凝神慕道事老聃
授之上道能飄然飛步凌波涉險或化麋鹿或為鳩
鵲弋獵者自不能近或為蟲癩之人與病者寢處自
然疾瘥宣王丁巳歲遂上昇為僊

王子喬 列仙傳名晉周靈王太子生而神異好吹笙
作鳳鳴遊伊洛間道士浮邱公接上嵩高山三十餘
年去之后復至其山見桓良曰告我家七月七日待
我緱氏山頭至日果乘白鶴駐山巔望之不得到舉

手謝時人而去

祝鷄翁 搜神記洛人居尸鄉北山下養鷄百餘年鷄有千餘頭皆立名字暮棲樹上晝放散之欲引呼名即至賣雞及子得錢千餘萬輒棄去之吳作養魚池後昇吳山白鶴孔雀數百嘗止其傍云

丁實 集異記多游洛陽自稱嵩山隱人髮白如絲面若桃華色或問曰君想百歲何時隱嵩山實曰我秦時儒士以坑儒時逃遇老叟授一丸藥吞之至於今不記多少歲也仙人俱白日昇天我非神仙但得長生駐顏之道不得乘虛御氣之理故不能昇仙也實每歲春必至洛陽數十年人皆識焉唐天寶末祿山

反實謂人曰我須避胡言訖而去不復再至

薊子訓

後漢書方術傳不知何許人建安末至洛陽

有神異公卿以下候之者恒數百人皆為設酒脯終日不匱後因遁去有人於長安東霸城見與一老人共摩娑銅人相謂曰適見鑄此而已近五百歲矣

摩騰

高僧傳本中天竺人解大小乘經明帝夜夢金

人以問羣臣傅毅曰臣聞西域有神其名曰佛陛下所夢將必是乎乃遣中郎蔡愔等往天竺尋訪因見摩騰要還中國於洛邑西門外立精舍以處之遂譯四十二章經後卒於洛陽中國有沙門自騰始

竺法蘭

高僧傳中天竺人誦經論數萬章為學者師

與摩騰同入中國其言皆有徵信蔡愔所得西域經
多蘭所翻譯

佛圖澄 晉書執術傳西域人永嘉中來洛陽善念神
呪能役使鬼物言事無不驗左乳旁有一孔通腹內
時以絮塞之遇夜拔絮一室洞明或臨流引腸洗之
已復納入石勒石虎甚敬事之比死之日有人見於
流沙虎既殮澄疑其不死因發墓開棺視之唯見一
石虎虎曰師葬我而去矣未幾虎死

阿羅竭 神僧傳未詳氏族誦經二百萬言獨宿山野
在武帝時嘗至洛陽時患疫竭為呪治十瘥八九元
康初止婁至山石室中去水甚遠竭以左脚碾石壁

壁陷水出比卒隨維之焚爍累日尸不煨燼乃移還石室

耆域 神僧傳天竺人周流華戎人莫能測惠帝未嘗至洛陽時南陽滕永文寓滿水寺足孿屈不可行域取淨水楊枝呪之永文起行如故一日辭還天竺洛中沙門數百人各請域食域皆許往明日五百舍皆有一域已而行衆皆送至城外域徐行追者不能及也是日有從長安來者見域在彼寺中賈客胡溼登又謂是日將暮逢域於流沙計九千餘里云

跋陀 傳燈錄天竺人一稱佛陀學務靜攝博通經法孝文帝一見敬禮隨遷定都伊洛勅設靜院居之陀

性愛幽棲林谷是託屢往嵩嶽擬謝人世未幾帝勅就少室山為之造寺今之少林是也連度二沙門慧光慧稠年老移寺外一善神常隨擁護將終手畫神像於門壁於今尚存

慧光 傳燈錄長盧人姓楊氏年十三隨父入洛從佛陀陀令誦經度而出家所習經典便為人說辭既清靡理亦高華時人號為聖沙彌佛陀更授以律復參禪學論說之美聲颺趙郡會佛陀住少林寺主譯翻十地諸經光乃命章開釋華嚴涅槃維摩十地等並書其奧旨遇早光於嵩嶽池邊請禱尋即流霑後卒於鄴郡此中國人度僧之始

寶公 伽藍記不知何許人居白馬寺形貌醜陋預觀
三世胡太后問以世事對曰把粟與雞呼朱朱人莫
之解逮建義元年后為爾朱榮所害其言始驗又有
俗人趙法和請占早晚當有官爵寶公曰大竹箭不
須羽東廂屋急手作經月餘法和父沒始悟大竹者
杖東廂者倚廬

曇謨最 伽藍記融光寺僧善於義學講涅槃華嚴僧
徒千人天竺國胡沙門菩提流支見而禮之號為菩
薩流支解佛義知名西土諸夷號羅漢曉魏言及隸
書翻十地楞伽及諸經論二十三部每讀曇謨最義
大乘章彈指贊歎唱言微妙即為胡書寫之傳於西

域西域沙門常東向遙禮號曇謨最為東方聖人
澄覺 嵩書會善寺本魏孝文帝離宮也魏亡為澄覺
禪師精舍

大志 傳燈錄姓顧氏初在天台出家游廬嶽建靜觀
道場大業間往東都上表乞興顯三寶願燃一臂於
嵩嶽詔許之志不食三日燒鍊烙臂以刀截斷布裏
蠟灌下火燃之時誦法句為眾說法不絕臂燒既盡
下棚跏坐而卒

華嚴 傳燈錄學於神秀謂之北祖嘗在洛都天宮寺
弟子三百餘每日堂食齊集有夏臘者因借鉢於沙
彌誤碎之臘因怒而死遂化蛇來殺沙彌嚴以錫杖

叩其首禁戒而去

晏公 高僧傳會善寺無水唐時高僧晏公講經於此
龍變作人來聽晏公向龍乞水龍贈以泉自殿右宛
轉流及山門而沒止供寺汲不資灌溉

乘如 五燈會元會善僧大歷二年如請允抽白馬寺
僧赴戒壇洒埽講律具表謝帝手敕荅之王維過乘
如禪師蕭居士嵩邱蘭若詩無著天親弟與兄嵩邱
蘭若一峯晴食隨鳴磬巢鳥下行踏空林落葉聲迸
水定侵香案溼雨花應共石牀平深洞長松何所有
儼然天竺古先生

淨顯 全唐詩洛陽首座沙門善詩

王旻 神仙通鑑居洛陽青羅山鄉里見之已數百歲
開元中召至京待以優禮復遣從李元靖求補僊書
還請歸舊山不復入城嘗與達奚侍郎友善旻死
猶杖屨詣達奚人始知其尸解云

申泰芝 神仙傳洛陽人徙居長沙嘗遊息南嶽訪神
仙之文一夕於祝融頂遇真人傳金丹火龍之術遂
能乘虛神遊隱顯出入人不能測

如滿 醉吟先生傳居龍門香山寺與白居易善紺珠
如滿香山九老之一

田璆

鄧韶 施肩吾嵩嶽記三禮田璆與其友鄧韶博學能

文皆以人昧不能彰其明家於洛陽元和開中秋之
望攜盃出門求望月地遇二書生邀入別莊飛泉松
桂奇草異花頃見羣仙相會歌詩和樂復出來時車
門惟見嵩山嵯峨比歸家已歲餘其家人招魂葬於
北邙之原墳草宿矣於是瓊韶捐棄家室同入少室
山

邊洞元 嵩書洛陽人幼隸籍為道士游四方貨藥自
給一日登峯嶺遇書生以木簡負數冊書又攜一壺
同憩古松之下既別贈一卷書

混沌 趙葵行營錄太祖微日嘗與一道士游無姓名
自曰混沌每劇飲爛醉且善歌能引其喉於杳冥之

間作清微之聲時或一二句隨天風飄下惟太祖聞
之御極後求之無踪或見於轅轅道中或嵩洛間
劉處元 金史本傳字通妙號長生子武官人大定十
八年遷洛城東北雲溪洞門人為鑿洞室忽得石井
眾方駭異處元曰不遠數尺更有二井此三生前修
煉處鑿之果然金主召問至道之要對曰寡嗜欲則
身安薄賦歛則國泰金主悅勅以故寓菴為靈虛觀
以居之一日鳴鼓集眾告以去期乃曲肱而逝
郝講師 元好問詩長安冠蓋羅青雲洛陽車馬爭紅
塵怪君掉頭不肯住寂寞來作由東鄰
泰然 舊志名維樂俗姓張昌平人駐錫洛之法藏寺

卷五十三
即今水陸禪堂僧所重建也以念豆佛為人鄙之自
常拈一豆示人人莫之知一日沐浴焚香謂弟子曰
吾生世緣盡於此端坐而化時有白氣騰空拜禮者
甚衆邑人於七里橋見僧拈豆西行猶通寒暄如平
日到寺僧已示寂旬餘矣

徹空 少林寺志洛陽人手內有文成慈字少時祝髮
晝習釋典夜讀儒書天順中令僧未度者還俗空歸
家父母議婚辭之後請度參從公得曹洞真宗從公
遂將僧伽黎印證法語手卷並拂塵付之住少林以
高僧兼工詞賦請詩千文者戶外屨嘗滿歿葬少林
寺西

照微 採訪冊字洞然善醫先後活人無祿僧臘八十
有五自知亡日端坐說偈而化
寧一 採訪冊寧一好誦儒書詩律書法皆嚴整尤善
醫活人無祿

孫頤覆校李錫爵校對

